

AWIG – AWIG
DESA ADAT TEGALWANGI



DESA NYALIAN
KECAMATAN BANJARANGKAN
KABUPATEN KLUNGKUNG
PROVINSI BALI

AWIG - AWIG DESA ADAT TEGALWANGI
DESA NYALIAN, KECAMATAN BANJARANGKAN
KABUPATEN KLUNGKUNG

MURDDHA CITTA

Om Awighnam Astu.

Sangkaning asung kretta waranugrahan Ida Sanghyang Widhi Wasa miyah prabhawan Ida sane kasiwi utawi kasungsung ring wawidangan desa adat Tegalwangi saha kadulurin antuk manah subhakti lan wirang ring desa adat, krama desa adat Tegalwangi prasida ngamargiang swadharma nyuratang lan maripurnayang awig-awig desa adat Tegalwangi sane mapituas sumangdannya sadagingin awig-awig sane wenten prasida sumaih lan nenten lempas ring pakibeh jagate makadi mangkin, pamekas sida nginutin manut ring pawarah kasukrettan guru wisesa.

Manut ring kasuksman kahuripan sane mungguh ring niyasa Desa Adat Tegalwangi mawiwit saking rihin rawuh kamangkin krama Desa Adat Tegalwang kukuh lan rajeg ngamargiang swadharmaning agama lan swadharmaning nagara manut ring kasutreptian miyah kasukrettan sane kacumawisang ring pakukuh Dasar Negara Kesatuan Republik Indonesia (NKRI), Pancasila lan Undang Undang Dasar Republik Indonesia 1945 sajeroning nuluh tatujon kahuripan krama siddha nyujur kalanduhan lan kagemuhan, masahang utawi ngawonang sahananing sane ngardi kasinangkawonan mawastu kabecikane sane inggil ring Desa Adat, mabantang antuk ngawredhyang Tri Hita Karana miyah nelebang sakancan pangaweruh sane kamurddhaning lan kapramananing oili Agama Hindu miyah widya sastra lan susastra tiosan sane mawiguna pinaka dasar siddha ngawredhyang Desa Adat Tegalwangi rawuh kapungkur wekas.

Kabhyudayan krama Desa Adat Tegalwangi gumanti khas lan unik, lango, siddha nudut pikahyunan sapisanan wreddhi ring taksunnyane, punika maka sami pinaka caciren utawi cihna sane tinglas ring sajeroning kahuripan krama adat sane magenah ring wawidangan Desa Adat Tegalwangi, Desa Nyalian, Kecamatan

Banjarangkan Jagat Klungkung. Indike puniki majanten ring pantaraning kawredhyan Desa Adat maweweh sayan-sayan rajeg kawentenan nyane sangkaning ring sajeroning ngupapira kahuripan desa adat punika kamargiang pidabdab sane kabantangan lan katedungan antuk Awig-Awig Desa Adat, Pararem-Pararem miwah Ilikita tiosan sane mapakilitan ring desa adat, mahawinan Desa Adat Tegalwangi ring sajeroning mapidabdab pastika siddha nunggilang wiguna utawi fungsi self governing community kalawan self regulating community manut pakibeh jagate sakadi mangkin.

Manut dresta Desa Adat punika wantah pinaka pasayuban krama adat, warga adat rawuhing kulawarga pawongan nyane sami mawastu raris desane kamanggehang pinaka bhuwana agung lan pawongan nyane pinaka bhuwana alit. Sotaning pawakan bhuwana agung, desane taler kamanggehang pinaka bhawa mahurip, sane kacirenin olih wentene pakilit pamargi lan pangrajeg Tri Hita Karana sane nenten dados pasahang sajeroning panglinaksanan nyane, sane maprawerti makadi ring sor :

1. Parhyangan inggih punika sakancaning genah suci pinaka panyiwian desa adat, genah ngarcana prabhawan Ida Sanghyang Widhi, manggeh pinaka jiwa pramanan desane.
2. Pawongan inggih punika krama rawuhing warga desa sinamian sane pinaka pawakan trikaya manggeh pinaka bhayu pramanan desane, mahawinan desane prasida mapolah maprawerti.
3. Palemahan inggih punika sakancaning wawidangan palemahan sane wenten ring kakuwub desa adat (carik, tegal, karang) manggeh pinaka sthula sariran desane.

Pakilitan pikamkam desa adat puniki sane mahawinan kawentenan wangun desa adat prasida werdhi ngawit saking rihin kantun lajer jejer rawuh mangkin lan kapungkur wekas.

Desa Adat Tegalwangi.

**BANTANG AWIG - AWIG
DESA ADAT TEGALWANGI**

MURDHANING AWIG - AWIG.

MURDDHA CITTA	1
BANTANG AWIG - AWIG	3
NIASA DESA ADAT SAHA KASUKSMAN NYANE.....	5
SARGAH PRATAMA ARAN LAN WAWIDANGAN DESA ADAT	7
SARGAH KALIH PAMIKUKUH LAN PATITIS.....	7
SARGAH TIGA SUKRETTA TATA PARHYANGAN	8
Palet 1 - Dewa Yajnya.....	8
Palet 2 - Bhuta Yajnya.....	18
Palet 3 - Pitra Yajnya.....	22
Palet 4 - Manusa Yajnya.....	30
Palet 5 - Rsi Yajnya	32
SARGAH EMPAT SUKRETTA TATA PAWONGAN	33
Palet 1 - Indik Krama	33
Palet 2 - Indik Pamucuk Desa Adat	49
Palet 3 - Indik Pacalang Desa Adat	61
Palet 4 - Indik Kulkul	64
Palet 5 - Indik Paruman	66
Palet 6 - Padruwen Desa Adat	72
Palet 7 – Pawiwanah.....	75
Palet 8 - Palas Marabian utawi Nyapian	80
Palet 9 - Indik Santana.....	83
Palet 10 - Indik Warisan.....	85
SARGAH LIMA SUKRETTA TATA PALEMAHAN	87
Palet 1 - Indik Karang, Tegal, Carik Miwah Setra	87
Palet 2 - Indik Wawangunan	92
Palet 3 - Indik Wawalungan.....	94
Palet 4 - Indik Kakayonan	96
Palet 5 - Karesikan Miwah Kalestarian Desa Adat	98

SARGAH ENEM WICARA, BHAYA LAN DUSTA MIWAH PAMIDANDA.	
Palet 1 - Indik Wicara	102
Palet 2 - Bhaya Lan Dusta.....	104
Palet 3 - Indik Pamidanda	107
SARGAH PITU NGUWAH - NGUWUHIN AWIG – AWIG.....	110
SARGAH KUTUS S A M A P T A	111
LEPIHAN.	

NIASA DESA ADAT TEGALWANGI



KASUKSMAN NIASA:

- (1) Bucu lima (segi lima) pinaka niasa utawi pralambang Desa Adat Tegalwangi ngukuhang dasar panagara Indonesia inggih punika Pancasila.
- (2) Gambar Bintang pinaka niasa pralambang Krama Desa Adat Tegalwangi nginggilang pangubhakti majeng ring Ida Sanghyang Widhi Wasa manut sasuduk Tattwa Agama Hindu sane karembayang sajeroning pangajah Panca Sraddha;
- (3) Padi lan Kapas pinaka niasa utawi pralambang desa adat Tegalwangi maprawerti gumantine sidda ngardhi kajagadhitan pinaka cihna kawentenan jagate landuh lan gemuh (asing tinandur sidda mpu);
- (4) Candi Bentar Mawarna Barak pinaka niasa utawi pralambang janma uttama bhyuhing wiweka sidda tunggil ring tri pramana (bhayu, sabda, idhep) mahawinan prasida masahang kasinang-kawonan manados kabecikan (prawertin rwa bhineda);
- (5) Gunung pinaka niasa utawi pralambang pageh ngamargiang pangaci majeng Ida Sanghyang Widhi lan para Ista Dewata

- gumanti sane ngicenin panugrahan bhoga, Upabhoga lan Paribhoga siddha kapuponin;
- (6) Undag Tatiga pinaka niasa utawi pralambang desa adat Tegalwangi ring tata adat nyane kadasarin antuk sasuduk utawi kasuksman tattwa Tri Hita Karana;
 - (7) Bunga Tunjung pinaka niasa utawi pralambang kasucion;
 - (8) Warna Pelung pinaka niasa utawi pralambang kasukrettan;

SARGAH PRATAMA
ARAN MIWAH WAWIDAGAN

Pawos 1

Desa Adat puniki mawasta Desa Adat Tegalwangi saha sampaun kaunggahan kasurat ring lepihan Peraturan Daerah Provinsi Bali Nomor 4 Tahun 2019 antuk cihna registrasi Nomor 1344 indik Desa Adat di Bali;

Pawos 2

- (1) Desa Adat Tegalwangi ngawidangin siki Banjar Adat inggih punika Banjar Adat Tegalwangi;
- (2) Wawidangan Desa Adat Tegalwangi mawates nyatur :
 - ha. Sisi kangin : Telabah Besang;
 - na. Sisi kelod : Tukad Tanah;
 - ca. Sisi kauh : Tukad Melangit;
 - ra. Sisi kaja : Tepi kelod Carik Beji;

SARGAH KALIH
PAMIKUKUH MIWAH PATITIS

Pawos 3

Desa Adat Tegalwangi ngamanggehang pamikukuh :

- (1) Pancasila;
- (2) Undang - Undang Dasar Negara Republik Indonesia 1945;
- (3) Ilikita lan Uger-uger saking guru wisesa sane mapakilitan ring Desa Adat;
- (4) Tri Hita Karana manut tattwaning Agama Hindu;

Pawos 4

Desa Adat Tegalwangi ngamanggehang patitis :

- (1) Ngukuhang miyah ngarajegang Agama Hindu;
- (2) Nginggilang tata prawettine Magama Hindu;

- (3) Ngarajegang kasukrettan desa adat lan krama desa adat sekala niskala;
- (4) Satata mangulahaken kalanduhan lan kasutreptyan desa adat miwah kajagadhitian krama desa adat;
- (5) Satata sayaga nyanggra pidab dab dharmaning nagara miwah dharmaning agama;

SARGAH TIGA
SUKRETTA TATA PARHYANGAN
Palet 1
Indik Dewa Yajnya
Pawos 5

- (1) Pura utawi kahyangan panyungsungan Desa Adat Tegalwangi miwah piodalan nyane, makadi ring sor :
 - ha. Kahyangan tiga Desa Adat Tegalwangi :
 - 1) Pura Puseh piodalan nyane ring dina Saniscara Kliwon wuku Kuningan;
 - 2) Pura Desa utawi Baleagung, piodalan nyane ring dina Saniscara Kliwon wuku Kuningan;
 - 3) Pura Dalem piodalan nyane ring dina Anggara Kliwon wuku Medhangsia;
 - 4) Pura Prajapati piodalan nyane ring dina Anggara Kliwon wuku Medhangsia;
 - 5) Pura Masceti piodalan nyane ring dina Saniscara Kliwon wuku Kuningan;
 - 6) Pura Malanting miwah palinggih panghuluning Banjar Adat piodalan nyane ring dina Saniscara Kliwon wuku Landep (tumpek landep);
 - (2) Pangupapiran soang-soang pura panyungsungan Desa Adat Tegalwangi kaprabea miwah kalaksanayang olih Desa Adat Tegalwangi;

- (3) .Pangaci miwah yajnya sane kamargiang ring pura utawi kahyangan panyungsungan desa adat Tegalwangi agung alit manut sastra agama saha kalaksanayang nginutin kasuksman nistha madhya uttama muah dresta;

Pawos 6

Krama desa adat utawi sapa sira ugi sane ngaturang atos miwah punagi sane marupa sarana, punia, piranti uparengga miwah sakaluir nyane, maka sami punika patut kadadosang padruwen desa adat saha kasuratang ring ilikita oih prajuru desa adat;

Pawos 7

Kasukrettan Kahyangan

- (1) Krama Desa Adat Tegalwangi rawuh kawarga sami sane wenten ring kakuwub wawidangan desa adat Tegalwangi patut satata nginggilang lan nyejerang kasukrettan miwah kasucian kah-yangan utawi pura;
- (2) Sane tan kawenangan/kalugra ngaranjing kagenah suci (pura) inggih punika :
- ha. Sang sane mengpeng kacuntakan/kasebelan, carcan ka-cuntakane makadi ring sor :
- 1) Sebel sangkaning ngaraja sewala;
 - 2) Sebel sangkaning ngembasang putra;
 - 3) Sebel sangkaning karuron;
 - 4) Sebel sangkaning sungkan ila muang tatularan;
 - 5) Sebel sangkaning pawiwahan;
 - 6) Sebel sangkaning gamia gamana;
 - 7) Sebel sangkaning salah timpal;
 - 8) Sebel sangkaning mobot tan pawidhi widhana;
 - 9) Sebel sangkaning mitra ngalang;
 - 10) Sebel sangkaning malaksana asta dusta muang sad atatayi;

- na. Jadma sane kasinanggeh leteh luire: jadma mobot/beling tan kasinangaskara, jadma buduh, sungkan illa sadurung polih kaprayascitta manut Agama Hindu tan wenang ngaranjing kagenah suci;
 - ca. Ubuh-ubuhan utawi buron suku pat sabinaning mapaketan ring sarana upakara miwah mapapada;
 - ra. Jadma sane mabhusana nenten nginutin tata kramaning ngaranjing kagenah suci/pura;
 - ka. Makta sahanan sarana sane kasinanggeh leteh miwah cemer manut agama Hindu;
 - da. Sakaluiraning kawentenan miwah pidabdab sane pacang prasida ngardi kaletuhaning genah suci;
- (3) Tata laksana utawi pratingkah sane tan kapatutang ring pura makadi ring sor :
- ha. Masumpah cor utawi nanggap cor;
 - na. Ngamargian dharmaning matetamban ring pura sungsungan desa adat;
 - ca. Maujar ala, ulah ala, wak parusya, manah rusit lan irsyia, dengkak-dengkik (abhregas), nemah misuh lan sakancan nyane;
 - ra. Majaljal (maiyegan), mayuda napi malih jantos metu rah dahat ala;
 - ka. Ngugah wastra/bhusana, pusungan miwah masusuin / macecepin anak alit/ rare;
 - da. Ngugah wastra/bhusana wenang kamargiang olih sulinggih sane pacang muput yajnya ring uttama mandhala miwah pragina sane pacang ngayah ngawali/wawalian kangkat kamargiang ring madhya mandhala, sasampun masolah kangkat rawuh ka uttama mandhala;

- ta. Mabacin, mabanyu, macumbana, masanggama, makolem lanang-istri jadma sampun daha-taruna masarengan sajeroning sengker parhyangan utawi pura;
- sa. Majajuden, mangan kinum sane mateges maoneng-onengan, bilih-bilih ngantos mabuk-mabukan tan kawenangan ring madhya muah uttama mandhalaning kahyangan suci;
- (4) Sapasira ugi sane mamurug kecape ring ajeng (pawos 7, angka (2), miwah angka (3), patut kadanda manut pararem;
- (5) Prade wenten krama desa adat utawi warga pangoreg desa adat karawuhan utawi kalinggihan niskala napkala ngamargiang upacara yajnya ring pura utawi ring genah suci tiosan, panepas nyane patut kasulurang makadi ring sor :
- ha. Patut kapintonin gumentos sidha muktyang yukti tan yuktin nyane kalinggihan dening niskala, antuk pamargi
- 1) Kalambes utawi kasiram antuk toy;
 - 2) Manut dresta kasuled antuk geni asep/dupa;
 - 3) Prade sang karawuhan nenten belus miwah biapara majanten sang malaksana kadi punika wyakti kalingganing dening niskala, prade belus lan biapara pastika janma inucap ngawi-awi utawi makardi tan patut ring pura utawi genah suci inucap;
- na. Sapasira ugi sane malaksana makadi kecape ring ajeng (pawos 7, angka (5), tur mabhukti mapratingkah ngawi-awi utawi lempas ring tattwaning agama Hindu patut kadanda manut pararem;
- (6) Kahyangan kadhurmanggan carcan nyane makadi ring sor :
- ha. Karubuhan dening taru agung;
- na. Kasiratan rah janma;
- ca. Katibanan lulut;

- ra. Karanjingan sato suku pat sabinaning sato sane pacang mangge kanjekan mapepada;
 - ka. Katibanan pandung, sander kilap, gelap, kalinggihan wong ungaran, buduh miwah sakancan nyane;
 - da. Karanjingan utawi kagenahang miwah kasiratan sawanng wong lan sarananing pakumbelan makadi sarana sane mawit saking setra genah pakutangan;
- (7) Krama desa adat miwah sapa sira ugi sane manggihin cihnan kadhurmanggalan sane nibenin pura utawi genah suci inucap patut digelis nguningayang majeng ring prajuru desa adat sanisthane majeng ring jan banggul pura inucap gumantin nyane mangda digelis sidda kamargiang panyapsap utawi kaprateka malih mangda mawali kasucion nyane;
- (8) Prade kadhurmanggalan inucap mawetu sangkaning pakardin manusa patut kawicarayang tur kapuputang manut ring kasukrettan sane manggeh ring jagate madasar patitis agama Hindu lan hukum adat sane manggeh ring desa adat:

Pawos 8

Indik Pamangku

- (1) Soang-soang pura patut kadegang pamangku;
- (2) Tatacara ngadegang pamangku makadi ring sor :
 - ha. Nginutin turunan pamangku (ngawaris) saha kasungkemin olih krama desa adat;
 - na. Nyanjan mapiteges mapinunas ring niskala ring pura utawi genah suci sane pacang kadegang pamangkun nyane;
 - ca. Kacatri/papilihan utawi palintingan sane kamargiang ring sajeroning paruman agung desa adat utawi ring pura/genah suci sane pacang kadegang pamangkun nyane maserana antuk linting lekesan saha katuntun olih yajamana upacara lan bandesa adat;

- (3) Tan wenang kadegang pamangku luire :
- ha. Cedangga wit saking embas;
 - na. Salah ulah, salah laku;
 - ca. Gering tatularan, sungkan ila, buduh, beseh miwah sapanunggilan ipun;
 - ra. Panten miwah patita;
 - ka. Janma sane madruwe oneng-onengan panca Ma (Maling, Madat, Motoh, Madon, Mitra);
- (4) Prabea kapamangkuan makadi ring sor :
- ha. Pawintenan pamangku kaprabea olih sang ngadegang pamangku, makadi desa adat utawi pangempon pura soang-soang;
 - na. Riwekasan prade pamangku seda prabea upacara patiwa-tiwan nyane kaprabea olih sang ngadegang pamangku, makadi desa adat utawi pangempon pura soang-soang;
 - ca. Yan pamangku seda tan wenang suruping ksithi dharani sabinaning sima dresta desa adat sane nampih kahyangan jagat utawi sad kahyangan miwah adat Bali Kuno utawi Bali Aga;

Pawos 9

Tatacara ngalaksanayang patiwa-tiwan pamangku :

- (1) Prade pamangku kahyangan tiga seda patut kaupacara olih desa adat saha sthti pujan nyane kangkat kamargi-ang ring genah sane kacumawisang olih prajuru desa adat sane kamanggala olih bandesa adat;
- (2) Prade pamangku kahyangan tiga seda, pangupapiran upacara patiwa-tiwan nyane kalaksanayang olih kula-warga pamangku inucap sakemawon swakaryan nyane karomba olih krama desa adat miwah prabeaupacara palebonan nyane rawuh kapangiriman saking desa adat;

- (3) Agung alit pangambilan upacara palebon pamangku kahyangan tiga sane seda kaputusang manut pararem;

Pawos 10

- (1) Prade wenten kulawarga pamangku kahyangan tiga utawi kulawarga pamangku pura tiosan kalayu sekaran, pamangku pura inucap tan keni kacuntakan salami pamangku nenten maceluban kadunungan sang kalayu sekaran utawi mengpeng ngayah ring pura amongan nyane ngantos kamargiang paka-keludan ring dunungan sang kalayu sekaran;
- (2) Prade pamangku maceluban kadunungan utawi dunungan sang kalayu sekaran tios, pamangku patut ngamargiang upacara pamarisudha raga utawi nyepuh raga sadurung ngamargiang swadharmaning kapamangkuan;

Pawos 11

- (1) Swadharmaning Pamangku makadi ring sor :
- ha. Pamangku patut tinut satuwuk ring sasananing kapamangkuan miwah agem-ageman kapamangkuan;
 - na. Ngenterang, ngokasang, ngantebang upakara-upacara ring pura utawi kahyangan miwah soang-soang pakubon krama desa adat utawi genah suci tiosan manut amongan lan kapatutan pinandhita utawi kapamangkuan;
 - ca. Ngokasang, ngantebang bhakti panawuran umat utawi krama manut pamutus prajuru adat;
 - ra. Ngutamayang ngamargiang swadharma kapamangkuan ring pura amongan nyane;
 - ka. Siaga ngarombo pamangku tiosan manut ring pabuat miwah kawenangan nyane;
 - da. Satata siaga dados tatuladan miwah titi pangancan majeng ring krama miwah umat sadharma sajeroning

- mapikah- yun, mapidabdab, maparilaksana manut ring tatuek tattwa, sasana miwah acara agama Hindu (upakara-upacara);
- ta. Satata siaga lan tureksa majeng ring kawentenan pura utawi genah suci amongan nyane miwah pura tiosan saha masadok ring prajuru adat indik kawentenan ring pura sane gumanti patut kauningin olih prajuru adat lan sane patut kasadokang;
- sa. Nuntun krama desa adat utawi umat Hindu sane wenten ring sawidangan desa adat mangda satata eling saha nginutin pidabdab, parilaksana sane mapituas sida nginggilang kasukrettan kahyangan lan kasukrettan ring desa adat;

Pawos 12

- (1) Pamangku kahyangan tiga napkala piodalan ring kahyangan tiga lan pura-pura panyungsungan desa adat tiosan kanjekan pamangku inucap ngamargiang swadharman nyane patut karomba olih pamangku-pamangku tiosan makadi pamangku paibon, panti, dadhya miwah sane lian-lianan ngantos puput pangecaning piodalan pura kahyangan desa adat inucap;
- (2) Nemugelang nepek ring tegak piodalan di pura kahyangan tiga desa adat Tegalwangi pamangkun nyane kapiambeng, kapatutang nyelang pamangku kahyangan tiga sane tiosan kantun ring sajebag desa adat tegalwangi ngantos puput pangecaning piodalan inucap;
- (3) Pamangku tan wenang keni ujar ala, ulah ala, sakemawon prade pamangku keni pariwsa utawi wicara kadi kinucap ring ajeng sangkaning pamangku teteg ngamargiang sasananing kapamangkuan saha nenten mabhukti malaksana iwang, wicarane puniki kasulurang makadi ring sor :

- ha. Pamangku sane kawicarayang inucap patut kaprayascita utawi kawintenin malih lan kapuput antuk sulinggih nanging prabea pawintenan punika katanganing olih sang ngenaning wicara;
- na. Sang malaksana iwang ring pamangku pura inucap patut keni pamidanda manut pararem;
- (4) Pamangku sane kasengguh amungpang paraning laku kabawos ninggal kadaton, patut pamangku inucap :
- ha. Kararyangan dados pamangku saha ngalukar bhusana;
- na. Ngawaliang prabea pawintenan pecak kadesa adat saha ngaksama majeng ring krama desa adat sangkaning malaksana lempas ring sasananing kapamangkuan;
- ca. Ngaturang pejati papamit ring pura amongan nyane maruntutan upakara guru piduka lan bendu piduka kasaksinin olih prajuru desa adat;
- ra. Prade ngamanggehang guru panabean patut taler mapamit ring guru nabe kaupasaksi olih prajuru sami;
- ka. Sang malaksana amungpang paraning laku inucap salamin nyane tan wenang kanggen rohaniawan ring desa adat ;
- (5) Saheloan ring sadagingin uger-uger sane mawit saking guru wisesa (Perda 4 Tahun 2019) kangkat karincikang wawangunan patunggilan para pamangku sawidangan kakuwub desa adat sane madruwe tatujon :
- ha. Nyejerang patitis manut awig-awig desa adat;
- na. Nincapang pangaweruh sane mapakilitan ring kapamangkuan miwah widhya sastra tiosan sane mapituas prasida nginggilang kasukrettan pawongan pamangku, desa adat lan agama Hindu;
- ca. Nincapang sradha bhakti majeng ring Ida Sanghyang Widhi Wasa miwah Ista Dewata manut amongan pamangku soang-soang;

ra. Ngaraketan pasametonan pantaraning para pamangku pinaka tapakan widhi;

Pawos 13

Paolih-olihan pamangku luir nyane :

- (1) Kaping singgih manut linggih lan sasanania;
- (2) Pahan sarin canang sane kapupulang olih prajuru mawit saking bhakti para pamedek;
- (3) Luput sasandangan krama adat (pamangku kahyangan tiga);
- (4) Bhusana jangkep kapamangkuan;

Pawos 14

- (1) Pamangku kagentosin sangkaning :
 - ha. Seda, lampus;
 - na. Sungkan rahat;
 - ca. Pinunas ngaraga saha polih uwak-uwakan saking prajuru desa adat;
 - ra. Kanorayang;
- (2) Pamangku kanorayang sangkaning amungpang paraning laku utawi lempas ring sasananing kapamangkuan patut keni pamidanda manut pararem;
- (3) Pamangku ngalap rabi malih sangkaning rahayu patut katampenin rahayu saha kadulurin upacara pawintenan makadi patut nginutin sastra agama;
- (4) Pamangku istri marabian malih patut kawusanang dados pamangku bilih-bilih marabian kadura desa adat, pamangku inucap patut ngalukar bhusana saha ngaturang upacara papamit ring pura amongan nyane lan ngaksama ring paruman desa adat;
- (5) Sakaluiring pidabdab miyah parilaksanan pamangku sane ngardinin pamangku kacuntakan, sadurung ngamargiang

swadharmaning kapamangkuan patut ngamargiang panyapsap raga rihin antuk upacara pamrayascitta utawi nyepuh raga;

Palet 2

Indik Bhuta Yajnya

Pawos 15

- (1) Bhuta Yajnya inggih punika upakara-upacara sane mapituas nyomya sane marupa yajnya pabhyakalan ring prethiwi, kahyangan, sarwa prani miwah ring sarwa bhuta kala dhengen;
- (2) Upakara - upacara sane marupa pabhyakalan majeng ring sarwa prani kalaksanayang makadi ring sor :
 - ha. Upakara - upacara sane kamarging majeng ring sarwa entik - entikan, sarwa tumuwuh kalaksanayang nemoning dina Saniscara, Kliwon , Uku Wariga, ketah kabawos Tumpek Pangarah utawi Tumpek Pangatag;
 - na. Upakara - upacara sane kamargiang majeng ring sarwa sato utawi ubuh - ubuhan kalaksanayang nemoning dina Saniscara Kliwon Uku Uye, ketah kabawos Tumpek Kandang;
- (3) Upakara - upacara sane kamargiang ring prethiwi miwah kahyangan (pura) lan bhuta, kala, dhengen kawastanin caru. Pacaruan inucap agung alit makadi ring sor :
 - ha. Ekasato;
 - na. Pancasato;
 - ca. Panca kelud;
 - ka. Panca sanak;
 - da. Balik sumpah;
 - ta. Rsi Gana
 - sa. Tawur Agung;
- (4) Sakaluiring yajnya sane kamargiang ring desa adat sane mapakilitan ring panca yajnya pamargine agung alit nganutang

ring katattwaning nistha, madhya, uttama saha kalaksanayang madasar catur dresta (sastra dresta) patut panepas nyane puput ring sang sulinggih pinaka guru loka utawi sane kasinanggeh guru loka;

Pawos 16

Tawur Kasangha

- (1) Upacara tawur kasangha kalaksanayang ngawarsa apisan ring dina nemu tilem sasih kasangha, kamargiang magenah ring pempatan/catus pataning desa adat Tegalwangi;
- (2) Tawur kasangha kamargiang olih umat Hindu/krama desa adat pinaka runutan yajnya pacang nyanggra pangrawuh rahina panyepian sane kalaksanayang ring dina pananggal apisan sasih kadasa benjang nyane;
- (3) Munggwing dudonan nyanggra rahina suci nyepi punika makadi ring sor :
 - ha. Ngawit saking pangelong ping 11 (solas) ngantos pangelong ping 13 (tigawelas) sasih kasangha,dina punika pinaka masa ngamargiang pakiyisan utawi pamlastian saluirning pralingga, pratima utawi tapakan Ida Bhatara kasagara;
 - na. Sasampun puput ngamargiang pamlastian makasami pralinggan Ida Bhatara munggah ring Bale Agung Pura Desa, masambyangan Ida Bhatara arahina ring Bale Agung saha tegep sahilening upacarania;
 - ca. Ring pangelong ping 14 (empat belas) sasih kasangha kamargiang tawur utawi pacaruan sane magenah ring catus pata utawi pempatan desa adat;
 - ra. Sasampun puput ngamargiang tawur utawi pacaruan kalanturang antuk pamargi mudalang utawi ngantukang makasami pralingga, pratima lan tapakan Ida Bhatara sane masambyangan ring Bale Agung kagenah payogan

- Ida Bhatara soang-soang kadulurin antuk upacara panyineban;
- ka. Sasampun puput kamargiang upacara panyineban kalanturang antuk ngamargiang pangrupukan utawi mabuu-buu miyah ring soang-soang pakubon krama taler kamargiang kramaning pratingkah mabuu-buu;
- (4) Enjing nyane nepek ring pananggal apisan sasih kadasa pinaka pangawit Isaka warsa anyar kalaksanayang dina sipeng utawi panyepian (sepi - sipeng) antuk atiti laksana ngamargiang catur brata panyepian;
- (5) Munggwing daging lan kasuksman catur brata panyepian punika makadi ring sor :
- ha. Amati Geni teges ipun ring sajeroning panglinaksanan nyane nenten kadadosang ngamargiang swadharmaning kahuripan nganggen sarana geni utawi api (nenten dados ma-api-api), mateges nyomya sahananing pikahyun lan laksana sane ngawetuang mawigraha kroda lan bhyapara mahabhara ring angga sarira soang-soang;
- na. Amati Karya teges ipun tan kawenangan ngambil pakaryan (nenten dados ngambil sakaluiring pakaryan);
- ca. Amati Lalungan teges ipun nenten kadadosang malaluasan;
- ra. Amati Lelanguan teges ipun nenten kadadosang ngamargiang kramaning laksana maseneng-seneng (anyekung ikang jnyana sudha nirmala kapageh akena ikang awak);
- (6) Kasukrettan lan kasutreptian pamargin catur brata panyepian patut kapratyaksa oih prajuru desa adat sane kamanggala oih bandesa adat miyah kapatilik oih pacalang desa adat
- (7) Krama adat utawi sapa sira ugi sane mamurug pamargin brata panyepian inucap patut keni pamidanda manut pararem;

- (8) Catur brata panyepian nepek ring dina sipeng kalaksanayang ngawit saking endag surya (jam 06.00 galah semeng) ngantos jam 06.00 galah semeng dina benjang nyane antuk caciren suaran kulkul desa adat;
- (9) Prade wenten silih tunggil krama adat utawi sapa sira ugi sane madruwe anak alit (rare), kalayu sekaran, anak sungkan miwah sakancan nyane sane wenten ring sakuwub desa adat patut kaicenin wak-wakan olih prajuru sumangdannya nenten ngawetuung byapara majeng ring sang sane ngaraksa pikobete ring ajeng;
- (10) Prade nepek ring dina sipeng wenten anak sungkan muatang pangupapiran sane patut kabakta ke rumah sakit, prajuru adat patut ngicenin ilikita panglepas margi miwah pacalang desa adat sampun saheloan ring pacalang desa adat tiosan nepasin indik pamargin wicara makadi punika;
- (11) Prade nepek ring dina sipeng sinarengan ring tegak piodalan ring kahyangan desa utawi ring soang-soang dunungan krama desa adat patut kamargiang dharmaning pangunadika lan manawi mapinunas majeng ring sang sulinggih sumangdan nyane piodalan punika sampun prasida puput kamargiang sadurung galah jam 06.00 galah semeng (sadurung kasuarayang kulkul sipeng) saha kautsahayang nganggen sarana geni sakanisthan nyane;

Pawos 17

Nangluk Merana

- (1) Upacara Nangluk Merana kamargiang satunggil tilem sasih kanem;
- (2) Upakara sane patut kalaksanayang ring soang-soang dunungan utawi pomahan krama adat nginutin pawarah saking sang rumawos;

- (3) Sakaluiring pamargi upacara nangluk marana sane mapakilitan ring kawredhyan bangket utawi sawah miwah panegalan patut kamanggala olih kelian subak abian miwah pakaseh saha karembayang majeng ring kelian banjar adat miwah bandesa adat maka manggalaning desa adat;
- (4) Upacara yajnya sane mapituas pinaka paneduh jagat utawi panyegjeg/pamahayu jagat patut kamanggala olih bandesa adat miwah kelian banjar adat;

Palet 3

Indik Pitra Yajnya

Pawos 18

- (1) Sakaluiring upakara-upacara indik pamratekan (panyucian, pamralinan miwah pabhaktian) majeng ring janma sane sampun lampus kabawos Pitra Yajnya;
- (2) Upacara pitra yajnya sane lumbrah kabawos pangabenan sajeroning pidabdar nyane kalaksanayang antuk pamargi 2 (kalih) warna luir ipun :
 - ha. Sawa prateka mateges pamratekan sawa sane wawu lampus utawi kantun angga sariran nyane;
 - na. Sawa wedhana mateges pamratekan sawa sane marupa sawa karsian (awak - awakan sang lampus);

Pawos 19

- (1) Dudonan panglinaksanan upacara pitra yajnya punika ngawit saking nyiramang layon/sawa, mendem utawi ngeseng sawa, kalanturang antuk upacara atma wedhana utawi upacara nyekah (sekah - sekar);
- (2) Upacara pitra yajnya manut dresta sane manggeh ring desa adat Tegalwangi majeng ring pangupapiran sawa prateka (wawu lampus/sane kantun angga sariran nyane)

panglinaksanan nyane wenang/kangkat kamargiang makadi ring sor :

- ha. Upacara mendem pakingsan nentenkategepin antuk pirantitirtha pangentas;
 - na. Upacara Mendem sahamapangentas (tirtha pangentas);
 - ca. Upacara mageseng pakingsan nenten nganggen piranti panyucian panglepas tirtha pangentas;
 - ra. Upacara mageseng pakingsan sane kadulurin antuk tirtha pangentaslan tirtha tiosan patut kalanturang antuk kramaning mapakiriman;
- (3) Mendem sawa magenah ring setra desa adat Tegalwangi prade wenten krama adat utawi sapa sira ugi sane mamurug patut kadanda manut pararem;
- (4) Prade ring sajeroning desa adat wenten sang lampus langkungan ring adiri, napkala mamargi kasetra patut sinarengan, manut dresta tan kawenangan makajang wangke;
- (5) Prade wenten krama adat lampus nepek ring mengpeng kalaksanayang upacara pujawali (piodalan) ring kahyangan tiga utawi kahyangan panyungsungan desa adat, mendem sawa patut kamargiang antuk mendem pakingsan saha sasiliban (ngarereh dauh nemu sandi kala/sandi kaon);
- (6) Prade wenten seda nyambung pamendeman nyane patut nginutin pamutus sulinggih;
- (7) Tan kawenangan nyekeh sawa lintangan ring awuku (siki uku) tiosan ring layon sulinggih;
- (8) Prade ring desa adat wenten krama ngawangun karya ayu rarisi wenten krama kalayu sekaran, pangupapiran nyane makadi ring sor :
- ha. Prade sang lampus kapidabdar pacang mapendem kangkat kamargiang pamendeman sasiliban nginutin tataning pamendeman pakingsan miwah nenten nyuara-yang kulkul kapatian;

- na. Prade kapidabdab pacang kabenang utawi kapalebonang patut kamargiang kramaning ngeneng nyantos karya ayu sida puput kalaksanayang, saha sida mapag padewasan atiwa-tiwa sane pinih tampek ring pawanengan awuku ngawit kapatinia
- (9) Indik krematorium (kremasi) sane magenah ring dura desa adat Tegalwangi pamargin nyane wantah pinaka panepas wicara tata adat sane manggeh saha sang lampus gumanti magenah ring dura desa adat Tegalwangi;
- (10) Krama adat sane seda/lampus gumanti ring wawidangan desa adat Tegalwangi patut kaupapira ring setra desa adat, prade kabakta kadura desa adat doyan kabawos nundung sawa;
- (11) Prade wenten janma lampus ngadut manik/ngadut rare (mobot/beling) sadurung kaprateka kadi kramaning janma padem, bobotan nyane patut kabasah rihin (manik/rarene kamedalang rihin) wawu kalanturang pamratekan nyane;
- (12) Janma lampus wit sangkaning sungkan sane nularin utawi ngarambat ring janma tios, pangupapiran nyane patut nginutin pawarah sang rumawos;
- (13) Rare utawi anak alit sadurung tanggal untu lampus patut kapendem pramangkin tan ngetang padewasan;
- (14) Prade wenten janma lampus ring genah makadi panegalan, bangket miwah sakancan nyane ring sakuwub desa adat Tegalwangi, genah lampus punika patut kaupapira kasucion nyane olih kapatutan sang lampus madasar tuntunan utawi pawarah sulinggih saha kaenter olih prajuru adat;
- (15) Pangabenan utawi atiwa-tiwa kangkat kamargiang antuk kramaning pangabenan kinembulan yan prade sampun ingkup ring pikahyunan sang sane madruwe sawa;
- (16) Ngaben kinembulan kangkat kamargiang ring genah sinunggil pamilet taler kapatutang nganggen piranti sane wenten ring desa adat;

- (17) Ring desa adat Tegalwangi taler kalaksanayang kramaning ngaben ngamasa sane kamargiang napkala sasih karo antuk pikamkam makadi ring sor :
- ha. Ring wawidangan desa adat madruwe galah lagi ngawen-tenang upacara atiwa-tiwa (tan kabanda dening swakarya sane mabuat tiosan);
 - na. Nemugelang pikahyun sang madruwe sawa sareng prajuru adat;
 - ca. Sumangdannya nenten wenten sang lampus mapendem langkungan ring limang warsa;
 - ra. Kapidabdab mangda sami krama adat sane madruwe sawa saha magama Hindu prasida ngaturang sradha bhakti majeng ring kaluhuran nyane manut sastra Agama Hindu;

Pawos 20

- (1) Kasuksman kramaning ngaben kinembulan kamargiang ring desa adat madasar antuk parilaku miwah pidabdab makadi ring sor :
- ha. Pamatutnyane madasar sastra Agama Hindu;
 - na. Prasida kalaksanayang nginutin genah sane nenten ngawetuang pikobet pikahyunan (kangkat ring sinunggil sang madruwe sawa taler kangkat ring genah padruwen desa adat);
 - ca. Prasida danganan antuka muputang pakaryan turmaning nenten ngirangin kasuksman upacaramanuting sastra agama miwah manawi rawuh kaprabea prasida kacu-tetang dwaning ring sajeroning panglaksana upacara kangkat wenten sarana upakara sene dados karangkep pamargin nyane yaning sampun pada tunggil pabhaktian utawi tunggil panyungsungan manut geneologis atawa tunggal pabhaktian kawitan;

- (2) Napkala ngaben kinembulan kacumawisang nenten wentenmalih sane ngamargiang pangabeanan niri-niri, tiosan ring sane mapakilitanring trah wangsa pawongania, prade mamurug patut keni pamidanda manut pararem;
- (3) Pangabeanan niri-niri prasida lumaksana ring galah tiosan ring anjek pangabeanan ngamasa;

Pawos 21

Upacara pitra yajnya sane kabawos pangabeanan patut kamargiang makadi ring sor :

- (1) Ngeseng sawa napkala pangabeanan patut kamargiang ring setra desa adat tiosan ring palebonan sulinggih;
- (2) Niwakang padewasan majeng ring sang lampus patut kaputus olih sang sulinggih saha kapidabdab pamargin nyane olih prajuru adat sane madruwe kawenangan nitenin kasukrettan desa adat;
- (3) Sawaning sang maraga ekajati utawi pamangku tan wenang mapendem patut kabengolah sang ngadegang pamangku agung alit panglaksanan nyane manut pararem
- (4) Prade wenten padem wit sangkaning ngulah pati lan salah pati wenang kaprateka makadi patut, wewehin upakara pangulapan lan panebusan sang lampus;
- (5) Wenten makudang-kudang pidabdab pangabeanan manut ring parinaman nyane miwah manut ring agung alit upakara - upacara sane prasida kakardinin, pawilangan nyane makadi ring sor :
 - ha. Nginutin ring parinama miwah agung alit pakaryan nyane, pangabeanan sane kagelar makadi ring sor :
 - 1) Kramaning ngaben alit;
 - 2) Pranawa :
 - ha. Kusa pranawa;
 - na. Tirtha utawi toya pranawa

- 3) Swastha geni;
 - 4) Sawa prateka;
 - 5) Sawa wedhana;
- na. Nginutin agung alit prabea upakara - upacara miwah galah pangambilan pakaryan nyane, pangabenan kamar-giang makadi ring sor :
- 1) Pangabenan dadakan;
 - 2) Pangabenan tandang mantri;
 - 3) Pangabenan kinembulan;
 - 4) Pangabenan madhya;
 - 5) Pangabenan uttama;
- (6) Sapula-pali indik pangabenan ring ajeng sajeroning panglinaksanan nyane kaputus olih sulinggih miwah tatimbangan sang pacang ngalaksanayang upacara pangabenan sumangdan nyane nenten timpang utawi lempas ring sastra dresta miwah loka utawi desa dresta;

Pawos 22

Swadharmaning krama adat sane katibenin kalayu sekaran makadi ring sor :

- (1) Masadok ring prajuru adat, bandesa adat;
- (2) Sang sane madruwe kalayuan kasarengin olih bandesa adat utawi prajuru adat mapinunas pamargi indik padewasan lan pamratekan sang lampus;
- (3) Satinut ring kasukrettan sane manggeh ring desa adat pamekas indik panglinaksanan atiwa-tiwa miwah tataning migunayang setra;
- (4) Nyayagayang sarana upakara sane pungkuran pacang kakaryanin olih krama adat utawi sang rawuh matatulung;
- (5) Pranamya pangingu kasayagayang sakasidan nyane mangda sampunang jantos kabyaparan ngamargiang yajnya, tiosan ring sang adruwe yajnya gumanti ngabehin duaning punia

taler ngaranjing ring kasuksman yajnya sakemawon patut kada-saring antuk manah lascarya;

Pawos 23

Swadharmaning krama adat sajeroning atiwa-tiwa makadi ring sor :

- (1) Nyuarayang kulkul kapatian lan pangabenan olih prajuru adat
- (2) Nawur patus kalampusan utawi pangabenan manut pararem;
- (3) Kamanggala olih bandesa adat maritatas inggian pamargi sang kalayuan pacang mapendem utawi kabenang;
- (4) Krama adat ngaromba pakaryan sang kalayuan sane kamanggala olih bandesa adat, makadi :
 - ha. Uparengga atiwa-tiwa makadi eteh-eteh kapatian miwah pangabenan;
 - na. Nabdabin tatakan geni;
 - ca. Ngamong miwah nyandang sapula-pali upakara miwah uperengga atiwa-tiwa napkala mamargi kasetra rawuh kapabhasmian;
 - ra. Ngaromba napkala ngendagin lan ngebet tawulaning sawa;
 - ka. Nodya napkala nyiramang sawa;
- (5) Krama adat napkala ngamargiang patedunan adat nyanggra karya adat ring dunungan sang kalayuan ngantos kasetra patut kadasarin antuk manah lascarya lan ngamargiang dharmaning mapitulung gumentos pamargin nyane sida banban, trepti lan rahayu;
- (6) Tan kawenangan mungsang-mangsin sawa, patulangan (wadah/bade) miwah sauparengganing sawa napkala pamargin sawa kasetra, sang mamurug patut kadanda manut pararem;
- (7) Pakakeludan utawi pasapuhan kalaksanayang tigang dina sasampun pangabenan yadiastun upacara pangabenan nyane kamargiang ring dura desa adat antuk upacara pacaruan sane magenah ring :

- ha. Catus pata desa adat, madhya mandhala pura Dalem miwah pura Prajapati panyucian nyane antuk caru eka sata (nganggen ayam brumbun);
- na. Setra lan genah nangun upacara pakeludan nyane antuk caru panca sata(nganggen sarana ayam warna lima);
- (8) Prade wenten pidabdab lagi ngalanturang antuk upacara atma wedhana utawi upacara nyekah (sekah = sekar) kangkat/prasida kalaksanayang sasampun ngamargiang pacaruan inucap;
- (9) Prade wenten pidabdab pacang ngalaksanayang pitra yajnya sane masasuduk tandang mantri utawi ngalanus sapola-pali pamargin nyane nginutin pamutus sulingjh;

Pawos 24

- (1) Sawa utawi sang lampus sane wenang kabenang inggih punika sawa utawi sang lampus sane sampun mayusa (madruwe yusa) ngawit saking makupak (tanggal untu) rawuh sampun wredha/lingsir;
- (2) Sawa utawi sang lampus soran ring sane sampun makupak patut kaupapira upacara yajnya makadi ring sor :
 - ha. Sane marupa manik miwah kantun marupa gumpalan rah ring jeroning garbha sampun ruron, pamratekan nyane antuk upacara warak karuron;
 - na. Prade sampun marupa gumpalan daging, jangkep angganing janma ngantos sadurung kepus udel raris lampus, patut kaprateka antuk upacara ngalangkir;
 - ca. Rare sane mayusa sasampun kepus udel ngantos sadurung makupak seda/lampus pangupapiran nyane kaprateka antuk upacara ngalungah;
- (3) Prade wenten anak alit yusa rare lampus patut kapendem pramangkin tan dados inepang magenah ring setra rare;

Pawos 25

Pidabdar lan parilaku sane tan kapatutang kalaksanayang mapakilit-an ring pitra yajnya makadi ring sor :

- (1) Makta sahananing sarana utawi laluwu wit saking pangendag sawa ring setra kabakta kapalemahan desa adat bilih-bilih kagenah suci;
- (2) Nginepang bangbang;
- (3) Ngambil genah matayub/matis ring madhya miwah utama mandhalaning genah suci (pura) napkala mengpeng ngamargi-ang pabhsmian sawa ring setra;

Palet 4

Indik Manusa Yajnya

Pawos 26

- (1) Manusa Yajnya inggih punika upakara - upacara yajnya sane kalaksanayang olah umat Hindu sane matatuson ngupapira, mangawruhi, nyuciang sakala niskala manusa ngawit saking ngamargiang upacara mapawarangan lan mawetunia manik ring sajeroning goa garba sang ibu ngantos ring panepining yusa kahuripan;
- (2) Niasa panyucian sane marupa banten utawi upakara yajnya kamargiang risampun raga sarira sang rare jangkep nresti ring garbhaning sang ibhu;
- (3) Sadurung angga sarira mawetu ring garbhaning sang ibhu, kantun maraga manik yasa kerti sane patut kamargiang olah yayah renania inggih punika tapa, brata, yoga samadhi, cihnyang ring panglaksana makadi nenten magotra, tan wenang majudi, mapunyah-punyahan miwah sakancan nyane;
- (4) Sane ngaranjing ring kakuwub upakara - upacara manusa yajnya luir ipun :
 - ha. Upacara mapawarangan;
 - na. Magedong-gedongan;

- ca. Putra embas (rare lekad);
 - ra. Kepus Udel;
 - ka. Tutug kambuhan (abulan pitung dina);
 - da. Tigang sasih (sambut rare);
 - ta. Weton / otonan (yusa rare 6 sasih);
 - sa. Magunting (makutang rambut);
 - wa. Tutug kelih (rajasingha - rajasewala);
 - la. Mapandes/matatah/potong gigi);
 - ma. Mawiwaha, masakapan;
- (5) Ring sajeroning pacang ngardi putra sasana, upacara yajnya sane mungguh ring luwur punika mabuat patut kalaksanayang, dwaning manut ring tuntunan susastra Hindu panglinaksanan upacara manusa yajnya punika madruwe kasuksman makadi ring sor :
- ha. Penyucian sahananing sane mawetu wit sangkaning pidabdab, pikamkam, parilaksana yayah renan nyane, makadi upacara rare sakantun ring jeroning garba, putra embas, ngicenin rare aran, nyambut rare, paguntingan rambut kapratama;
 - na. Panyucian sahananing sane nenten becik sangkaning karma wasana, makadi upacara pawetuan (oton), munggah daha-truna (menek kelih), matatah, pawiwahan miwah sane lian-lianan;
- (6) Agung alit upacara yajnya sane kamargiang patut kanutang ring kawentenan sang mayajnya, duwaning manut ring sastra sampun kawedar katattwaning upakara-upacara nginutin kasuksman nistha, madhya lan uttama;

Palet 5

Indik Rsi Yajnya

Pawos 27

- (1) Krama adat utawi sapasira ugi sane pacang ngalaksanayang padwijatian utawi madeg sulinggihring wawidangan desa adat Tegalwangi patut masadok ring prajuru adat utawi bandesa adat;
- (2) Prajuru desa adat kamanggala olih bandesa adat patut sampun saheloan majeng ring prawartaka karya padwijatian gumantin nyane ngardi karahayuan sida muputang karya padwijatian inucap;
- (3) Sapasira ugi sane pacang madwijati (madeg sulinggih) patut ngamolihang pasuara pamutus saking Parisadha Hindu Dharma Indonesia (PHDI) sane madruwe kawenangan nayubin umat Hindu ring nusantara puniki;
- (4) Madeg sulinggih utawi madwijati manut ring pangajah agama Hindu utaman nyane nginutin sasana kawikwan para diksita patut ngamanggehang lan ngajegang guru nabe saha kasungkemin olih pasametonan sang diksita;
- (5) Prade ring sajeroning pikamkam pacang ngadegang sulinggih kantun karasayang durung ingkup pakilitan ring sajeroning pikahyunan para warga utawi pasametonan sang diksita, bilih-bilih kararinga ngantos majengilan, prajuru adat patut masasahan sareng prawartaka karya nitenin gementos prasida nyujur kagilikan pikahyun ngadegang sulinggih;
- (6) Sulinggih utawi sang dwijati, pandhita utawi sang wiku manggeh pinaka guru loka manut sastra sane pacang ngojah dharmaning kahuripan umat miwah sadagingin jagat maha-winan prade pacang masulinggih patut sampun pranamya ring sasananing kawikwan tan kasalimur dening babuatan ngaraga tur sampun lumepas ring kabyaparan jagat (ten dados aji mungpung);

- (7) Calon diksita tan kawenangan cedangga, ceda ulah, ceda laku, dwaning pungkuran pacang dados guru, nabe, panuntun salampah lakun umat Hindu;
- (8) Sulinggih patut satinut ring daging pangajah catur bandhana dharma pamekas indik amari aran (bhisekan sulinggih) paican sulinggih nabe patut kasobyahang majeng ring krama adat sajeroning paruman desa adat;
- (9) Sulinggih napkala ngawarah sakaluiring indik sane mapakilitan ring sadagingin sastra agama Hindu patut mapatilik ring kawentenan miwah kasukrettan sane manggeh ring soang desa adat makadi awig-awig, pararem miwah kasukrettan sane mawit saking guru wisesa;
- (10) Napkala ngamargiang dharmaning kawikan sulinggih patut ngariyinan utawi ngutamayang muput upacara yajnya ring desa adat sasampune wawu kadura desa adat tiosan sabinaning manawi sampun kamargiang paiguman majeng ring prajuru desa adat lan sang sane mapinunas pamuput yajnya;
- (11) Riwekasan prade sulinggih palatra utawi lebar patut kupapira pitra yajnyan nyane manut sastra agama Hindu;

SARGAH EMPAT

SUKRETTA TATA PAWONGAN

Palet 1

Indik Krama

Pawos 28

- (1) Krama desa inggih punika krama utawi satunggil kulawarga sane jumenek ring wawidangan desa/desa adat saha sampun manggeh kajenekan nyane madruwe dunungan miwah ilikita kajenekan nyane pastika tinglas ring sasuratan cacah jiwan nyane;

- (2) Krama desa adat manut ring linggih kajenekan nyane kepah dados tiga (3) luir ipun :
- ha. Krama adat inggih punika krama sane jumenek ring wawidangan desa adat miwah ring dura desa adat, mipil ring desa adat, magama Hindu, nyungkemin kahyangan tiga desa adat lan kahyangan tiosan sane dados panyung-sungan desa adat saha sayaga ngamong, momong saka-luiring sane mawetu pinaka tategenan miwah amongan desa adat miwah sayaga ngardi kasukrettan ring desa adat;
- na. Krama tamiu inggih punika krama utawi satunggil kulawarga sane jumenek ring wawidangan desa adat, magama Hindu, nenten mipil ring desa adat, nyungkemin kahyangan tiga desa adat, nginutin kasukrettan sane manggeh ring kadinasan, sakemawon satata linga lan urati ring kasukrettan pawongan miwah palemahan desa adat;
- ca. Tamiu inggih punika krama utawi kulawarga sane jumenek ring wawidangan desa adat, nenten magama Hindu, nenten mipil ring desa adat, nginutin kasukrettan sane manggeh ring kadinasan, miwah satata linga lan urati ring kasukrettan pawongan miwah palemahan desa adat;
- (3) Saparindikan krama miwah sapola-palin nyane sane nenten prasida kaonek ring sadagingin awig-awig puniki pacang katelatarang utawi kasuratang ring sajeroning pararem indik krama;

Pawos 29

Manut ring linggih kajenekan saha tategenan nyane, krama desa adat Tegalwangi kabinayang makadi ring sor :

- (1) Krama adat ngarep inggih punika krama sane mipil ring banjar adat sapisanan mipil ring desa adat sadwaning desa adat Tegalwangi kawangun dening tunggal banjar adat miwah tunggal dusun dinas saha jangkep ayah tategenania (lanang wadon). krama puniki taler kabawos krama bala angkep utawi kantun jangkep lanang wadon nyane pinaka krama adat;
- (2) Krama balu inggih punika krama adat wit sangkaning silih sinunggil pawongan nyane lampus utawi nyapihan (palas marabian);
- (3) Krama balu inucap madruwe tategenan saane kabinayang makadi ring sor :
 - ha. Krama balu kapatutan nyane keni ayah lan tategenan adat arirang utawi atenga dwaning manggeh pinaka krama mipil wantah tunggal utawi ngaraga (mawak asibak/ atenga lanang utawi wadon);
 - na. Balu ngalintik inggih punika krama balu sane nenten numbuhang pratisantana tur nenten madruwe warisan (tatamian brana) miwah nenten madruwe sameton purusa sane pacang ngerobang. Balu kadi puniki tategenan ring adat patut luput manuk;
 - ca. Balu makrambian inggih punika krama balu sane madru- we pianak, sampun madruwe cucu sakemawon sang balu tan mapikarsa marabian malih, tategenan ring adat sampun kasalukin utawi kagentosin olah pianak nyane, sang balu kangkat ngaranjing pinaka krama wredha;
 - ra. Balu ngempu inggih punika balu sane kantun madruwe pianak rare (kantun maempu), tategenan ring adat manut kawongan nyane;
 - ka. Balu ngatung inggih punika krama balu sane nenten madruwe pianak utawi santana, balu kadi puniki prade nenten kahyun ngerob ring sameton nyane tur jejer

- pacang ngamanggehang ayah ring adat patut keni tategenan arirang dwaning kantun manggeh pinaka krama balu;
- (4) Krama ngampel inggih punika krama adat ngarep sane mlagu utawi numbas ayah, indik pamargin ampelan katitenin utawi kamanggehang manut pararem;
 - (5) Krama penyade inggih punika krama sane pacang ngentosin linggih krama adat ngarep saha sampun ngaranjing ring pipil krama sekaa taruna;
 - (6) Krama pangele inggih punika krama sane napuk ring krama adat ngarep;
 - (7) Krama dhatu inggih punika krama sane mayusa langkungan ring 35 (sasur) warsa tur nenten mapikarsa ngamargiang kramaning alaki rabi ngantos lampus;
 - (8) Krama istri inggih punika papupulan lan paiketan para istri utawi para rabi krama adat lanang;
 - (9) Krama wredha inggih punika krama adat sane sampun kasaluk- in olih panyadan nyane saha sampun mayusa langkungan ring 65 warsa;
 - (10) Krama daha taruna utawi krama yowana inggih punika anak-anaking krama banjar adat sane sampun mayusa langkungan ring tiga welas warsa (13 th) tur durung marabian utawi mawiwaha ngantos pasasur warsa (35 Th) sane kapupulan ring sajeroning sekaa taruna utawi yowana;

Pawos 30

Tata caraning ngaranjing dados krama adat makadi ring sor :

- (1) Panemaya tedun ngawitin makrama adat napkala paruman desa adat nemu Budha Kliwon Dunggulan (Galungan);
- (2) Sangkaning sampun mawiwaha miwah sampun nepek ring pawilangan nyada (ngentosin ngayah);

- (3) Tinut satuwuk ring kasukrettan sane manggeh ring desa adat Tegalwangi lan satata mareringa ring pakibeh jagate sane mengpeng lumaksana saha mapawungu ring sakancaning kawentenan miwah pikamkam sane pacang prasida nincapang kasukrettan desa adat miwah kajagadhitian krama adat;
- (4) Krama adat sane madruwe putra lanang langkungan ring adiri sane kangkat nyada wantah adiri lan kaputusang oih krama sane kagentosin ayah nyane;
- (5) Sangkaning pinunas ngaraga saha sampun jangkep ring ilikita patinglas pawongan nyane tur katampenin oih prajuru desa adat;
- (6) Sangkaning ngamong karang ayahan desa adat dwaning karang inucap mapakilitan ring kahyangan tiga desa adat sane masti-kayang kainggilan palemahan desa adat inucap pinaka bhuwana agung manggeh kinucap bhawa maurip miwah sampun ngamargiang kramaning grhasta asrama (pawiwanan);
- (7) Desa adat Tegalwangi nampenin krama anyar sane mawit saking dura desa adat Tegalwangi tedun makrama adat antuk uger-uger makadi ring sor :
- ha. Satinut ring kasukrettan sane manggeh ring desa adat Tegalwangi;
 - na. Pawongan nyane kajangkepin antuk ilikita patinglas (pajanten raga) saking desa adat wiwitan nyane, sane nyantenang padewekan ipun kesah sangkaning rahayu;
 - ca. Nawur paridhana pamogpog manut pararem;
 - ra. Prade sang tedun makrama adat sampun makulawarga patut nyukserahang KK adat nyane ring prajuru desa adat Tegalwangi, sumangdan nyane prasida ngamolihang pasewakan saking desa adat Tegalwangi;
- (8) Krama patedunan anyar utawi sane sampun dados krama lawas prade kacihna mabhukti ngamargiang tatacara tedun

makrama adat bulak-balik sadurung masa limang warsa, krama sane oneng malaksana makadi punika patut kadanda uncar-ancir agung alit nyane manut pararem;

Pawos 31

Tata caraning ngaranjing dados krama tamiu makadi ring sor :

- (1) Masadok majeng ring kelian banjar adat miwah karembayang sareng bandesa adat saha katepasin antuk kasukrettan sane manggeh ring banjar adat miwah desa adat;
- (2) Nguningayang munggwing tatujone nyarengin jenek pinaka krama tamiu ring desa adat Tegalwangi saha kasobyahang ring paruman desa adat;
- (3) Sayaga ring atiti kramaning adat-istiadat sane manggeh ring desa adat sane mapituas gumanti pacang nyujur kawredian adat lan agama Hindu kapungkur wekas;
- (4) Satinut ring kasukrettan sane manggeh ring desa adat Tegalwangi sane mapakilitan ring kasukrettan pawongan lan palemahan desa adat;
- (5) Nginutin uger-uger sane manggeh ring kasukrettan dinas gumentos mangda ngamolihang pasewakan manut ring babuatan nyane (warga administrasi);
- (6) Mapunia ring desa adat manut pararem;

Pawos 32

Tata caraning ngaranjing dados tamiu makadi ring sor :

- (1) Masadok majeng ring kelian banjar adat saha karembayang majeng ring bandesa adat;
- (2) Jangkep indik ilikita pawongan tamiu inucap kasukserah ring prajuru adat pinaka pajanten angga lan tatujon nyane pinaka tamiu;

- (3) Prade tamiu inucap manggeh pinaka tamiu padgatakala (sementara) patut kajantenang napkala masadok ring prajuru kategepin antuk ilikita kadinasan;
- (4) Tamiu sane sampun madruwe dunungan ring wawidangan desa adat Tegalwangi patut kapastika nginutin kasukrettan dinas saha linga/urati ring karajegan adat-istiadat sane manggeh ring desa adat Tegalwangi
- (5) Mapunia ring desa adat Tegalwangi agung alit nyane manut pararem;

Pawos 33

- (1) Wusan makrama adat sangkaning :
 - ha. Seda utawi lampus;
 - na. Putung utawi tan wenten waris santana (katurunan);
 - ca. Pinunas ngaraga tur polih wak-wakan saking prajuru adat;
 - ra. Kanorayang sangkaning ngurugada (oneng ngardi bhuta) miwah ngalurug kasukrettan desa adat;
- (2) Nganorayang krama adat sangkaning piwal ring uger-uger utawi kasukrettan sane manggeh ring desa adat patut nginutin tata cara makadi ring sor :
 - ha. Tan kawenangan ngamargiang pamutus kasingsalan krama madasar antuk manah/pikahyun sane mawetu saking mabaat-baatan sinunggil krama sane mateges manah irsyia, duleg, irihati sinunggil krama bilih-bilih wit sangkaning pikamkam prajuru miwah suryak siyu;
 - na. Mabhukti kasingsalan nyane patut kapatingetin olih prajuru antuk pamargi marerasan makumanyama;
 - ca. Pang kalih pang tiga patinget prajuru tan kalinguang, makadi tan pangrungu ring linggih manggala desa, salanturnyane patut kapatingetin nganggen sarana sewalapatra (surat) ngantos undagan ping tiga nenten

- wenten pangwales rasa bhakti ring desa adat, patut katincapang pangreringan nyane;
- ra. Kapuceh pasewakan nyane sane mapakilitan ring sapolapalining adat-istiadat;
 - ka. Kapuwikin olih krama desa adat, sapasira ugi sane tan ngalinguang pasuara kadi puniki yadiastun pasametonan nyane patut keni pamidanda manut pararem;
 - da. Kabancut pipil cacah jiwan nyane ring desa adat lan karang ayahan desa adat sane kadunungin kawaliang kadesa adat;
 - ta. Prade sang kanorayang durung taler wenten mawetu manah lan parilaksanan ipune pacang mapidab dab ngesehin laku, manawi mula sangkaning panumadian nyane seneng makarya sane nenten becik, makarya sane tan rahayu ring jagate, becikan sampun tundung saking desa adat saha pangjanman nyane sukserahang ring sang rumawos;
- (3) Krama adat sane keni wicara kanorayang prade ring panta-raning wicara durung puput sampun prasida ngesehin paripolah nyane kangkat katampi malih mawali dados krama adat kajatimula saha katampenin antuk manah lascarya nenten ngetanggang baberatan malih;
- (4) Krama adat sane wusan utawi mapamit makrama adat sangkaning rahayu patut katampenin antuk pamargi sane rahayu saha papamit nyane kalaksanayang ring sajeroning paruman desa adat;
- (5) Krama sane pacang wusan makrama adat saparindikan panglaksanan nyane kamanggehang ring sajeroning pararem indik krama;

Pawos 34

Swadharmaning krama adat makadi ring sor :

- (1) Tinut satuwuk ring uger-uger, awig-awig miwah turunan nyane sane manggeh ring desa adat Tegalwangi;
- (2) Ngalaksanayang titah prajuru desa adat sane kamanggala olih bandesa adat miwah pawarah sane mawit saking guru wisesa sane mapituas ngardi kasukrettan desa adat lan kajagadhitan krama desa adat;
- (3) Manut ring kawongan nyane swadharma sane patut kalaksana- yang pinaka krama adat makadi ring sor :
 - ha. Krama mipil nawur urunan mamungkul lan ayah mepek;
 - na. Krama balu swadharman nyane kasulurang makadi ring sor :
 - 1) Balu ngalintik luput manuk, prade balu inucap mapakarsa ngayah manawi becik pikahyunan nyane patut katampenin antuk pikahyun rahayu boyo sangkaning papaksan utawi sasimbungan krama tios;
 - 2) Balu arirang keni peson-peson mamungkul ayah krama manut kawongan nyane;
 - 3) Balu ngatung mangda karobang olih sameton nyane utawi napuk ring tugelan nyane;
 - 4) Balu makrambian prade madruwe santana sampun mawiwaha patut digelis nyaluk ayah sang balu gumentos sida ngamargiang ayah krama adat;
 - ca. Krama wredha lan krama dhatu miwah krama daha taruna (yowana) keni ayah manut babuatan (pawarah prajuru), rerampen/peson-peson luput manuk;
 - ra. Napkala ngamargiang panglinaksanan adat-istiadat makadi piodalan ring kahyangan tiga miwah kahyangan panyungsungan desa adat tiosan, ngamargiang paruman, gotong royong miwah sakancan nyane patut

- ngadegang krama juru utawi kasinoman sane swadharman nyane kawarah lan katelatarang sajeroning pararem panyacah awig;
- ka. Napkala rerahinan jagat makadi galungan, kuningan, saraswati, pangusabhan, panyepian miyah sane lian-lianan, pamargin paresikan ring pura sane dados amongan pamangku patut karomba olih prajuru desa adat, para sarati banten miyah para yowana desa adat;
- (4) Manut ring panglimbak pangaweruh budayane lan nginutin titah uger-uger sane mawit saking guru wisesa gumentos tata adat-istiadat sane wenten ring jagat Bali (Desa Adat Tegalwangi) nenten kasep tangkis pacang nambakin pakibeh jagate mangkin miyah sane lagi rawuh mapakilitan ring swadharma-ning krama adat taler kawangun paiketan-paiketan makadi ring sor :
- ha. Paiketan krama istri;
- na. Paiketan sarati banten;
- ca. Paiketan karawitan / sekaa gong;
- ra. Paiketan magagitan/ sekaa santi;
- (5) Ring sajeroning ngamargiang swadharma pinaka krama adat manut drestha sane manggeh panglinaksanan nyane kapidab-dabin antuk ngamargiang ayah-ayahan. Ayah-ayahan krama adat kabinayang makadi ring sor :
- ha. Ayah-ayahan uttama kalaksanayang olih krama adat sane ngamanggehang kramaning dharma wiku/sadhaka / sulinggih utawi pandhita;
- na. Ayah-ayahan madhya kalaksanayang olih krama adat sane ngamanggehang kramaning dharma pinandhita utawi pamangku;
- ca. Ayahan krama adat kalaksanayang olih krama adat mipil, sampun mawiwaha utawi krama adat ngarep;

- ra. Ayah-ayahana krama yowana kalaksanayang napkala ngamargiang pararesikan, gotong royong, malasti/makiyis lan nginutin pawarahan prajuru desa adat;
- ka. Ayah-ayahana sane kalaksanayang ring desa adat sapisan-an mateges paturunan miwah peson-peson utawi reram-pen;

Pawos 35

- (1) Ring sajeroning ngalaksanayang tata kramaning adat-istiadat pinaka krama adat kadadosang :
 - ha. Mapuangkid mateges nenten tedun ngayah napkala :
 - 1) Nangun yajnya, ngaluang masengker dewasa;
 - 2) Ngamargiang dadawuhan sane mawit saking guru wisesa;
 - 3) Kapiyalangan utawi kabhyaparan makadi matepetin sungkan, kacuntakan, kalampusan miwah sakan-can nyane;
 - na. Nyada ayahan mateges ngamademang ayahan prade :
 - 1) Sungkan rahat saha tawunan;
 - 2) Mayusa langkungan ring nem dasa lima warsa (65 th) tur sampun madruwe panyelediyi;
 - ca. Nuku ayahan sane kadudonang makadi ring sor :
 - 1) Nuku ayahan antuk prabea sane kamanggehang manut pararem;
 - 2) Nuku ayahan antuk panyelediyi olih krama tiosan ring krama mipil;
 - 3) Nuku ayahan kamargiang olih krama adat sang-kaning krama inucap ngamargiang swadharma ning kahuripan ring dura desa utawi mapabuat wigunan kahuripan;
 - ra. Krama adat sane nyada ayahan patut karanjingan ring pakilitan krama wredha;

Pawos 36

Swadharmaning krama tamiu makadi ring sor :

- (1) Satinut ring tatiwak desa adat Tegalwangi sane kamanggala olah kelian banjar adat lan bandesa adat Tegalwangi;
- (2) Nginutin kasukrettan sane manggeh ring uger-uger kadinasan (administrasi), ring adat satata linga lan urati nyarengin miyah ngaromba panglinaksanan Tri Hita Karana ring widang pawong- an lan palemahan;
- (3) Prade madruwe pikahyunan pacang nyarengin (masinutan reringa laku / partisifasi) ring widang parhyangan sangkaning kahyun lascarya sidda katampenin olah prajuru desa adat miyah krama desa adat;
- (4) Patut mapunia majeng ring desa adat pinaka sarana sareng nitenin kawredian desa adat inucap;
- (5) Satata sayaga nincapang kasutreptyan lan karahayuan ring wawidangan desa adat;
- (6) Tan kawenangan ngukuhin karang ayahan desa adat, wantah prasida napuk ring krama mipil utawi mlaga ring desa adat;

Pawos 37

Swadharmaning tamiu kasulurang makadi ring sor :

- (1) Satinut ring pamutus desa adat sane kamanggala olah prajuru desa adat;
- (2) Patut satinut ring kasukrettan sane manggeh ring uger-uger kadinasan;
- (3) Prade tamiu inucap wantah pinaka tamiu padgatakala manawi sangkaning wenten pakilitan pasametonan ring sinunggil krama adat, sapola-palin nyane patut katanganing olah sang nampi tamiu inucap;
- (4) Mapunia majeng ring desa adat, agung alit nyane manut pararem;

- (5) Mararinga laku (berpartisifasi) ring desa adat sane mapakilitan ring widang pawongan lan palemahan;

Pawos 38

Swadikara utawi petias sane kamolihang oih krama adat, krama tamiu miyah tamiu kasulurang makadi ring sor :

- (1) Swadikara utawi petias majeng ring krama desa adat makadi ring sor :
- ha. Ngamolihang kasukrettan pasewakan saking desa adat ngawit saking pawongannia ngantos pakulawargan nyane miyah padruwean nyane;
 - na. Molihang pasayuban (perlindungan) mapakilitan ring kasutreptyan lan pangayoman saking desa adat;
 - ca. Ngamedalang pasuara/usul napkala paruman;
 - ra. Madruwe linggih kamanggehang pinaka pamucuk ring desa adat;
 - ka. Ngamolihang pamargi utawi panepas napkala katibenan wicara;
 - da. Sakaluiring babuatan kahuripan prasida kaicenin pasewakan oih prajuru desa adat sane mapakilitan ring babuatan pinaka krama desa adat;
 - ta. Katuntun miyah kadudonang sakancaning pamargi utawi pawarah sane mapakilitan ring panglinaksanan adat, agama, budaya, drestha miyah pidabdab sane mawit saking guru wisesa;
- (2) Swadikara utawi petias sane kamolihang pinaka krama tamiu makadi ring sor :
- ha. Polih pasayuban saking desa adat miyah desa dinas;
 - na. Ngamolihang pitulung saking desa adat napkala katiben-an wicara;
 - ca. Ngamolihang pasewakan manut ring babuatan nyane sane mapakilitan ring adat lan dinas;

- ra. Prasida katampenin prade pacang nyarengin pasuka duhkan krama;
- (3) Swadikara utawi petias sane kamolihang pinaka tamiu makadi ring sor :
- ha. Polih pasayuban saking desa adat miwah desa dinas;
 - na. Polih pitulung miwah panepas prade katibenan wicara majeng ring tamiu sane pangrawuh nyane sida ngardi rahayu ring desa adat lan sampun nginutin kasukrettan desa adat;
 - ca. Prasida madunungan ring wawidangan desa adat makuma laku napuk wiadin mlagu ring desa adat Tegalwangi;

Pawos 39

- (1) Krama adat, krama tamiu miwah tamiu prade pacang narima tamiu utawi janma tios saha tamiu inucap nenten wenten pasidikaran nyane utawi pasametonan ring sang nampi bilih-bilih pacang madunungan langkungan ring tigang dina, sang nampi tamiu inucap masengker patlikur (24) jam patut sampun masadok ring prajuru adat utawi dinas;
- (2) Tamiu sane katampi olah krama adat, krama tamiu miwah tamiu prade ngardi kabyaparan ring wawidangan desa adat Tegalwangi patut kaabih miwah katanganing laksanan nyane olah sang nampi tamiu;
- (3) Krama adat kasudi nganggen sarana adat sane marupa padruwen desa adat makadi bale banjar, tenda miwah sarana sane lianan prade ngawangun karya ayu utawi sakancaning swaraja karya, madasar pasadok ring prajuru desa adat;
- (4) Krama adat sane migunayang sarana padruwen desa adat patut kawigunayang makadi patut saha risampune puput mangge kawaliang manut genah sane sampun kacumawisang, prade sane kaselang marupa genah patut tureksa ring

- karasmiannyane (kabresihan nyane) karuntutin antuk mapunia saka lascaryan nyane;
- (5) Krama tamiu miwah tamiu kasudi nganggen sarana padruwen desa adat madasar antuk pamutus prajuru desa adat saha karuntutin dening panukun nyane sane kamanggehang manut pararem;
- (6) Krama adat, krama tamiu miwah tamiu sane nyelang utawi nganggen sarana padruwen desa adat napkala ngawaliang prade wenten sane patut kasuciang nganggen sarana upakara patut kamargiang makadi patut nginutin sastra lan dresta miwah pawarah lan pamutus sang ngawiwenang ring desa adat;
- (7) Krama adat, krama tamiu lan tamiu tan kawenangan makta wong larangan (istri jalir/tuna susila) ngaranjing marerep, madunungan ring wawidangan palemahan desa adat Tegalwangi, sapasira ugi sane mamurug keni pamidanda manut pararem;
- (8) Krama adat, krama tamiu lan tamiu nenten kadadosang madruwe, nganggen, migunayang, ngutsahayang, nyobyahang sahananing sarana sane nenten kadadosang olih guru wisesa makadi narkoba, psikotropika miwah sakancan nyane, sapasira ugi sane mamurug keni pamidanda manut pararem miwah sang sane malaksana kasukserah ring sang rumawos;
- (9) Krama adat, krama tamiu lan tamiu sane madruwe ingon-ingon sane gelis ngawetuang pinungkan ngelahlah (menular) makadi ayam grubug (sampar ayam), sampar paksi (flu burung), pinungkan asu (rabies), pinungkan babi/kucit (virus babi), kuku sapi miwah sakancan nyane patut sayaga pangupapiran nyane nginutin uger-uger saking guru wisesa;
- (10) Krama adat, krama tamiu lan tamiukapatutang sumangdania satata sayaga mautsaha mapidabdab ngardi karahayuan lan karahajengan sakala niskala ring kawredian miwah kalestarian

wawidangan palemahan desa adat, tan kadadosang maburu paksi, nube ulam miyah sakancan laksana sane ngawetuung kabhyaparan wawidangan (lingkungan) sane wenten ring kakuwub desa adat Tegalwangi, prade kapanggih mabhukti wenten sang malaksana ngarusak lingkungan patut keni pamidanda manut pararem;

- (11) Prade ring wawidangan desa adat Tegalwangi kacihna wenten sarwa sato utawi sarwa prani sane sampun kapastika ngawetuung bhyapara ring palemahan jagat Tegalwangi saha sampun ngawetuung wighna (dados hama) majeng ring sahananing entik-entikan sane sida ngamrettaning manusa, patut kasadokang ring sang rumawos saha sato inucap kangkat kapuceh panglimbak nyane;
- (12) Tatacara, tataiti miyah atitikrama prade krama adat, krama tamiu lan tamiu napkala narima sang pangrawuh sane mateges tamiu makadi ring sor :
 - ha. Sajeroning masengker adina (24 jam) utawi prade langkungan ring adina patut masadok ring prajuru desa adat utawi ring sang rumawos;
 - na. Prade tamiu inucap pacang marerep utawi madunungan ring paumahan krama patut sampun kareringa munggwing tatujon tamiu sane madunungan inucap;
 - ca. Tamiu sane rawuh nuju dunungan krama tur kantun wenten pakilitan utawi pasametonan ring krama sane narima, sapola-palinnyane dados kawenangan sang narima tamiu;
 - ra. Prade tamiu sane rawuh kawawidangan desa adat mapabuatan ring tata adat mangda kaicenin pasewakan digelis kasadokang ring prajuru adat;
 - ka. Tamiu sane rawuh kawawidangan desa adat nenten pastika munggwing tatujon nyane utawi kaparna manawi sida ngawetuung cinidran manah krama patut digelis

- kasadokang ring patilik desa adat (pecalang), prade mabhukti pacang mayanin patut digelis katundung utawi kasadokang ring sang rumawos;
- da. Tamiu sane rawuh sangkaning rahayu patut katampening antuk manah rahayu saha kaicenin pasewakan nginutin dharmaning kamanusan;

Palet 2
Pamucuk Desa Adat
Pawos 40


- (1) Sajeroning ngalaksanayang nitiprajaning adat - istiadat ring desa adat Tegalwangi kamanggehang nayaka praja adat pinaka pamucuking desa adat sane madudonan makadi ring sor:
- ha. Paruman desa adat;
- na. Pasangkepan banjar adat/pasangkepan para wibaga;
- ca. Manggala desa adat;
- ra. Prajuru desa adat;
- ka. Pecalang desa adat;
- (2) Paruman desa adat miwah pasangkepan banjar adat manggeh pinaka wibaga utawi lembaga sane madruwe kawenangan maka genah ngambil kaputusan indik sapola-palining tata adat-istiadat ring desa adat Tegalwangi;
- (3) Manggala Desa adat Tegalwangi madudonan makadi ring sor :
- ha. Sabha desa adat;
- na. Kertha desa adat;
- ca. Prajuru desa adat;
- ra. Pecalang desa adat;
- (4) Prajuru desa adat Tegalwangi madudonan makadi ring sor:
- ha. Bandesa adat pinaka manggalaning prajuru adat;
- na. Patajuh utawi pangliman pinaka wakil;
- ca. Panyarikan pinaka juru surat utawi sekretaris;
- ra. Patengen pinaka juru raksa utawi bendahara;

- ka. Juru utawi pangromba utawi pangenter;
- (5) Prajuru banjar adat madudonan makadi ring sor:
- ha. Kelian banjar adat;
 - na. Penyarikan pinaka juru surat utawi sekretaris;
 - ca. Patengen pinaka juru raksa utawi bendahara;
 - ra. Pasayahan pinaka juru dawuh;
- (6) Manggala desa adat utawi prajuru desa adat napkala ngamargi- ang swadharman nyane satata mapakilitan lan masikian bilih-bilih napkala pacang ngardi pamutus adat patut pamedalan nyane marupa pamutus sane gilik ingkup masikian (kolektif-kolegia);
- (7) Paruman desa adat miwah pasangkepan banjar adat utawi pasangkepan para wibaga kamanggehang pinaka piranti adat sane mabuat genah mucukang pikahyun napkala pacang ngamedalang pamutus indik pamargin adat-istiadat ring desa adat Tegalwangi;
- (8) Sabha desa adat manggeh maka manggalaning desa adat sane madruwe kawenangan pinaka dewaning tatimbang napkala ngarincikang sakaluiring pangrencana pawangunan sane kamargiang ring desa adat Tegalwangi bilih-bilih pangrencana pawangunan adat-istiadat sane mapakilitan ring sajeroning migunayang sahananing prabea sane mawit saking krama miwah saking genah tiosan sane sampun manggeh dados padruwen desa adat;
- (9) Kertha desa adat manggeh pinaka manggala desa adat sane madruwe kawenangan nitenin kasukrettan desa adat sane mawetu saking sangkaning panglinaksanan kawicaksanan tata adat, budaya, agama, drestha miwah sakancaning pidabdab sane ngawinang bhyapara majeng ring karajegan miwah kalestarian desa adat Tegalwangi;

- (1) Ngadegang prajuru desa adat nginutin tatacara makadi ring sor:
 - ha. Kamanggehang ring sajeroning paruman desa adat;
 - na. Ngadegang prawartaka pamilihan manggala desa adat;
 - ca. Ngadegang calon sane pacang kapilih utawi kasudi;
 - ra. Uger-uger calon kamanggehang sajeroning kaputusan prawartaka pamilihan;
 - ka. Kasudi utawi kapilih oih krama adat sane mipil;
 - da. Angga prajuru kapilih oih bandesa adat kasungkemin oih krama desa adat;
 - ta. Prajuru sane sampun kapilih sadurung ngamargiang swadharman nyane patut kaupasaksi sakala niskala miwah kaprayascitta ring Pura Desa / Bale Agung utawi ring pura kahyangan tiga;
- (2) Ngadegang sabha desa adat miwah kertha desa adat kasudi oih bandesa adat saha kasungkemin oih krama desa adat;
- (3) Sabha desa adat miwah kertha desa adat kamanggehang pinaka manggala desa adat mawiwit saking kasepuhan lan kawagedan nyane sajeroning tata adat, agama, budaya, drestha miwah widhya sastra sane lian-lianan;
- (4) Manut ring kasukrettan pamedalan guru wisesa (Perda 4 tahun 2019) Bandesa Adat ring pamilakun nyane sapisanan pinaka manggalaning kertha desa adat, teges ipun mamutus sahanan wicara adat sane sampun katimbangin oih angga kertha inti (angga kertha sane waged ring kasuksman hukum adat miwah widhya sastra tiosan) utawi mafungsi/mawiguna exofficio;
- (5) Prade sajeroning wicara, sane mawicara punika prajuru adat bilih-bilih sane keni wicara bandesa adat, manggala kertha desa patut kagentosin linggih nyane oih angga kertha desa

sane pinih sepuh sajeroning ngamargiang swadharman nyane ngarapih wicara ngantos puput buntas wicarane katepasin;

- (6) Dudonan panglinaksanan manggala desa adat Tegalwangi kacu- mawisang ring sajeroning struktur makadi ring sor:



Pawos 42

- (1) Sabha desa adat kawangun saha angga sane madudonan maka-di ring sor :
- ha. Manggalaning sabha desa adat;
 - na. Penyarikan sabha desa adat;
 - ca. Pasayahan sabha desa adat;
- (2) Kertha desa adat kawangun saha angga sane madudonan makadi ring sor:
- ha. Manggalaning kertha desa adat;
 - na. Penyarikan kertha desa adat;
- (3) Pecalang desa adat kawangun saha angga madudonan makadi ring sor :
- ha. Kelian pecalang;
 - na. Penyarikan pecalang;
 - ca. Patengen pecalang;

- ra. Juru dawuh/kasinoman;
- (4) Sabha desa adat, kertha desa adat, pecalang masa ngamargiang swadharman nyane ngawit kamanggehang ngantos puput sinarengan ring masa paayah-ayahan prajuru desa adat masuwe limang warsa (5 th) sasampune kangkat kasudi malih mawaneng siki masa sasampun nyane patut mararyan (tan wenang kasudi malih);
- (5) Sane kamanggehang pacang ngamong pinaka manggalaning desa adat Tegalwangi kangkat kasudi krama desa adat Tegalwangi sane mipil ring adat saha madruwe kawagedan ring sapariindikan adat-istiadat, budaya, agama Hindu, drestha miwah widya sastra sane lianan sane mayusa sanisthane telung dasa warsa (30 th) ngantos pitung dasa warsa (70 th) yadiastus sampun nyada ring desa adat tur kasungkemin oilih krama desa adat;

Pawos 43

- (1) Swadharmaning Sabha desa adat makadi ring sor :
- ha. Ngawantu prajuru desa adat ngicenin tatimbang napkala pacang ngawangun pakaryan makadi ring sor :
- 1) Maripurnayang awig-awig, pararem miwah ilikita tiosan sane sampun wenten miwah ngarincikang uger-uger adat sane anyar;
 - 2) Ngarincikang sakaluiring pidab dab pawangunan ring desa adat;
 - 3) Ngarincikang tatacara migunayang sahananing prabea sane pacang mangge ring pawangunan desa adat;
- na. Nabdabin saha nureksain sakancan pamargin pawangun-an miwah panglinaksanan prabea pawangunan sane sampun kaparidabdab sajeroning APB Desa Adat;

- (2) Swadharmaning Kertha Desa Adat makadi ring sor :
- ha. Narima, nureksa, muputang sakancaning wicara adat ring desa adat Tegalwangi manut ring dasar pangaweruh widya sastra hukum adat, pamutusnyane kamedalang olih bandesa adat;
 - na. Muputang wicara adat patut mapagamel ring awig-awig, pararem miyah uger-uger sane mawit saking guru wisesa miyah widhya sastra tiosan sane mapakilitan ring tata adat lan agama Hindu;
 - ca. Kertha desa adat patut saheloan (masikian) majeng ring sakancaning wibaga tiosan sane wenten ring desa adat napkala pacang nepasin wicara sane mawetu ring desa adat, sadwaning desa adat manggeh pinaka wawangunan peradaban macampuh ring indik adat-istiadat, budaya, agama Hindu, dresta miyah tatanan sane anyar;
 - ra. Ngarawuhang majeng ring Majelis Desa Adat (MDA) manut undagan nyane sahananing wicara sane metu ring desa adat prade nenten prasida kapuputang ring sajeron-ing desa adat Tegalwangi;
 - ka. Nreptyang lan nureksain panglinaksanan sahanan pidabdab pawangunan sumangdan nyane sida nepek ring pangrencana sane sampun kamanggehang tur nitenin saluiring pidabdab sane sidda ngardi panglaksanan tata adat sane nenten patut (mawiguna prefentif);

Pawos 44

- (1) Swadharman Prajuru Desa Adat kasulurang makadi ring sor :
- ha. Swadharmaning Bandesa Adat makadi ring sor :
 - 1) Ngarincikang sahananing pangencana pawangunan ring desa adat;

- 2) Nudonang panglinaksanan sakancan prabea sane pacang natakin pamargin pawangunan ring desa adat sajeroning awarsa;
- 3) Ngarincikang lan ngamanggehang pangrencana pawangunan kapungkur wekas mawates limang warsa;
- 4) Ngalaksanayang piodalan ring kahyangan tiga miwah kahyangan tiosan sane manggeh pinaka panyungsungan desa adat;
- 5) Nitenin sakancan pawangunan ring pura kahyangan tiga miwah pura panyungsungan desa adat tiosan rawuh kauparenggan nyane manut ring susastra miwah dresta sane manggeh ring desa adat Tegalwangi;
- 6) Ngalaksanayang awig-awig, pararem miwah ilikita tiosan sane manggeh ring desa adat;
- 7) Nudonang pamargi mapakilitan ring sahananing pidabdab sane prasida ngawetuang kasukrettan krama adat miwah kasutreptyan jagat Tegalwangi madasar antuk susastra miwah dresta sane manggeh ring desa adat Tegalwangi;
- 8) Ngamargiang parikramaning LPD manut ring AD/ART LPD lan pararem LPD;
- 9) Ngamargiang parikramaning BUPDA manut ring AD/ART BUPDA lan pararem BUPDA;
- 10) Ngamargiang parikramaning Subak manut ring pararem pasubakan;
- 11) Nguningayang miwah nyobyahang sakancan sane kapidabdab, karincikang, kalaksanayang miwah phalaning swakarya ring sajeroning paruman desa adat, punika taler pakaryan sane mengpeng kalak-

- sanayang kasobyahang sajeroning paruman desa adat;
- 12) Nguningayang sakancan panelas prabea sane mawit saking guru wisesa manut ring uger-uger sane kamanggehang olah guru wisesa;
 - 13) Ngalaksanayang swadharma tiosan sane mawit saking guru wisesa miwah sang rumawos tiosan sane mapakilitan ring desa adat;
- na. Prajuru desa adat tan kawenangan :
- 1) Mamurug ring awig-awig, pararem miwah ilikita tiosan sane manggeh ring desa adat Tegalwangi;
 - 2) Ngamargiang kramaning parisolah sane nenten kapatutang olah susastra agama Hindu makadi asta dustha, asta cora muang sakancan nyane;
 - 3) Ngamedalang pamutus sane nenten madasar rasa keadilan (tan wenang mabaat-baatan);
 - 4) Lempas ring swadharma utawi ngalurug kawenang- an pinaka prajuru adat;
 - 5) Ngamedalang pamutus sane prasida ngardi kabhyaparan ring krama adat;
 - 6) Nginutin parikramaning laku sane tan kawenangan olah guru wisesa (narkoba, judi, organisasi terlarang) miwah sakancan nyane;
 - 7) Prade nenten nginutin daging pawos ring ajeng aksara na angka 1) - 6), kararyanang pinaka prajuru desa adat miwah kadanda manut pararem;
- ca. Swadharmaning Patajuh utawi pangliman inggih punika ngawantu bandesa adat ring sajeroning :
- 1) Ngarencanayang miwah ngalaksanayang APB Desa adat;
 - 2) Nudonang pamargi sane mapakilitan ring paayah-ayahan krama adat;

- 3) Nudonang panglaksanan yajnya napkala piodalan ring kahyangan tiga miwah kahyangan desa adat tiosan ring sakuwub desa adat Tegalwangi;
 - 4) Ngamargiang swadharma tiosan sane kapatuduhang olih bandesa adat utawi manut ring dadawuhan saking guru wisesa;
- ra. Swadharmaning penyarikan inggih punika ngawantu bandesa adat ring sajeroning :
- 1) Ngawangun tataititi, tatacara sakancaning ilikita (administrasi) sane patut manggeh ring sajeroning nitipraja desa adat;
 - 2) Nyarik utawi nyuratang sakancan pamutus sane kamedalang ring desa adat;
 - 3) Mastikayang sumangdane sakancan padruwen desa adat madruwe ilikita manggeh pinaka bhukti hukum padruwen desa adat;
 - 4) Satata ngawangun pangeling-eling satunggil ngawen tenang paruman sane marupa notulis utawi berita acara paruman;
 - 5) Ngawangun tataning ilikita (administrasi) desa adat sane rapi, becik miwah patut, pinaka dasar lan paneges napkala pacang ngaryanin pangrancana pawangunan pungkuran utawi anggen dasar ngambil kaputusan prade ring desa adat mawetu wenten wicara;
 - 6) Ngamargiang swadharma tiosan sane kapatuduhang olih bandesa adat utawi dadawuhan saking guru wisesa;
- ka. Swadharmaning patengen utawi juru raksa inggih punika ngawantu bandesa adat ring sajeroning :
- 1) Ngaraksa sadhana artha padruwean desa adat;

- 2) Nudonang pamargin prabea sane sampun kacumawisang manut pangrencana;
 - 3) Ngamargiang pawarah bandesa adat mapakilitan ring babuatan prabea sane pacang kamedalang;
 - 4) Mastikayang ring sakancaning pidabdab sane nganggen jinah utawi paridhana druwen desa adat kategepin antuk cihna bhukti sane marupa ilikita sadhana artha (bukti proses keuangan) sane manggeh (sah);
 - 5) Ngardi kriya patra piuning indik pangranjing miwah panelas sadhana artha padruwen desa adat lan padruwen desa adat tiosan sane pinaka dasar atur piuning bandesa adat sajeroning paruman;
 - 6) Tan kawenangan mucuh sahananing cihna bhukti sadhana artha padruwen desa adat;
 - 7) Ngamargiang swadharma tiosan sane kapatuduh-ang olih bandesa adat miwah dadawuhan saking guru wisesa;
- da. Swadharmaning juru utawi pangromba ngawantu prajurudesa adat ring sajeroning :
- 1) Ngenter lan nudonang pamargin paruman desa adat manut acara sane sampun kasungkemin;
 - 2) Ngaromba sahananing pakaryan sane mawetu sangkaning pangrencana sane sampun kacumawis -ang pinaka program pawangunan ring desa adat;
 - 3) Ngalaksanayang swadharma tiosan sane kapatuduh ang olih prajuru desa adat;
- (2) Sabha desa adat, kertha desa adat, prajuru desa adat kapatut-ang ngamolihang petias utawi paolih-olihan saha pastika sampun kaonek utawi kasurat sajeroning APB Desa Adat satunggil ngawarsa;

Pawos 45

Bandesa adat napkala ngamargiang swadharman nyane pinaka manggalaning desa adat madruwe wawenang makadi ring sor :

- (1) Ngamanggehang utawi mutusang miwah nabdabin indik pangrencana LPD lan BUPDA desa adat Tegalwangi;
- (2) Ngamanggehang miwah mutusang RAPB Desa Adat manados APB Desa Adat satunggil ngawarsa;
- (3) Migunayang padruwen desa adat sajeroning ngamargiang swadharma pinaka prajuru;
- (4) Ngadegang miwah ngararyanang patilik (pengawas), prajuru LPD, BUPDA miwah prajuru subak (ngararyanang prajuru subak nganggen tatacara rekomendasi (tatimbang) dwaning pasubakan madruwe uger-uger sane manggeh ring subak);
- (5) Nyudi angga nayaka ilikita/administrasi sane pacang ngawantu pakaryan sajeroning administrasi (staf administrasi);

Pawos 46

Wawanengan miwah ngentosin manggala desa adat lan prajuru desa adat kasulurang makadi ring sor :

- (1) Sabha desa adat, kertha desa adat prajuru desa adat miwah pecalang desa adat ngamargiang paayah-ayahan ring desa adat ngawit saking kakukuhang, maprayascita ring pura desa/baleagung (kahyangan tiga) desa adat Tegalwangi ngantos masa limang warsa (5 th) apisan;
- (2) Sabha desa adat, kertha desa adat, prajuru desa adat miwah pecalang desa adat prade sampun puputing sengker ayahan nyane patut kararyanang, sakemawon sasampune mararyan kangkat kasudi malih pinaka manggala desa malih siki masa nginutin tatacara sane pateh makadi sane sampun manggeh antuk panglaksana manut pangunadika mawates wiguna buat tan mabuat;

- (3) Kalih sasih sadurung rawuh panemaya puput sengker paayah-ayahan manggala desa adat inucap patut sampun kapidabdabin indik ngamanggehang manggala desa adat sane anyar, gumen-tos nepek ring puputing sengker manggala desa adat punika sampun wenten pangentos manggala desa adat sane anyar;
- (4) Ngadegang prajuru banjar adat pateh pawilangan nyane makadi ngadegang manggala desa adat;
- (5) Sabha desa adat, kertha desa adat, prajuru desa adat miwah pecalang desa adat kagentosin sangkaning :
- ha. Sampun puputing sengker paayah-ayahan nyane;
 - na. Lampus, seda, padem;
 - ca. Sungkan rahat tan prasida ngamargiang swadharma;
 - ra. Pinunas ngaraga sangkaning sampun nenten mrasida-yang ngayah utawi sangkaning ngamargiang swadharma ring panegara;
 - ka. Ngalurug kasukrettan sane manggeh ring desa adat;
 - da. Sangkaning ngamargiang asta dustha, astha cora, nyaliwegang padruwen desa adat miwah sakancan nyane;
 - ta. Manggala desa sane mabhukti mamurug ring kasukrettan desa adat patut keni pamidanda manut pararem;
- (6) Prade wenten manggala desa adat sane kagentosin sangkaning malaksana ngalurug kapatutan miwah kasukrettaning desa adat sajeroning masa kantun manggeh, swadharman nyane patut kalanturang olah manggala utawi prajuru manut undagan nyane ngantos puputing sengker nyane;
- (7) Sabha desa adat, kertha desa adat, prajuru desa adat, pecalang mararyan tan pasamandana saha nenten pastika sangkan nyane patut keni pamidanda manut pararem;

Pawos 47

Prajuru desa adat nenten kakenaning rerampen (peson-peson) napkala piodalan utawi pujawali ring kahyangan panyungsungan desa adat taler ngamolihang tanding tengah sakemawon ring urunan pawangunan sane mapabuat prabea jinah manggeh keni mamungkul;

Pawos 48

- (1) Banjar Adat, banjar sukha duhka utawi banjar sane nganggen pracihna tata adat tiosan (parinama tiosan/sebutan lain) linggih nyane manggeh pinaka pahan utawi kepehan saking desa adat;
- (2) Ring desa adat Tegalwangi nenten malih ngaryanin pararem indik uger-uger ring banjar adat sapisanan ngamargiang awig-awig sane kakardining olih desa adat Tegalwangi dwaning banjar adat Tegalwangi drestan nyane tunggal ring desa adat Tegalwangi;

Palet 3

Indik Pacalang

Pawos 49

- (1) Sane kawastanin pacalang inggih punika krama desa adat Tegalwangi sane ngamong swadharma ngardi, nitenin, ngamar-giang kasutreptyan ring wawidangan desa adat Tegalwangi;
- (2) Pacalang utawi jagabhaya utawi patilik ring desa adat karanjingan pinaka sinunggil piranti kaprajuruan desa adat sadwaning ring sajeroning pamargin tata adat satata pacang muatang pangabih kasutreptyan sane kaamongin olih pacalang;
- (3) Pacalang utawi jagabhaya utawi patilik desa adat ring sajeronin nitenin kasutreptyan parikrama adat lan agama Hindu manut ring panglimbak jagate makadi mangkin

- talerkabuatang sumangdan nyane prasida nitenin kasutreptyan majeng ring parikrama sane mapakilitan ring dharmaning agama miyah dharmaning nagara;
- (4) Pacalang desa adat napkala ngamargiang swadharma sane mapituas dharmaning nagara patut kalaksanayang nganggen cacireن bhusana pacalang sane kategepin antuk rompi BAKAMDA;
 - (5) Dudonan kaprajuruan pacalang desa adat Tegalwangi makadi sane sampun kawedar ring pawos 42 angka (3) ring ajeng;
 - (6) Ngadegang miyah ngararyanang manggalaning pacalang miyah angganing pacalang kalaksanayang ring sajeroning paruman desa adat;
 - (7) Tatacara ngadegang pacalang inggih punika kasudi utawi kacatri olih bandesa adat tur kasungkemin olih krama desa adat sajeroning paruman;
 - (8) Sane wenang kanggen pacalang patut ngingginutin uger-uger sulur angga makadi :
 - ha. Mawiwit saking krama adat mipil;
 - na. Seger, waras sakala niskala miyah tan cacad angga;
 - ca. Wikan mamaca (baca) miyah nyurat (tulis);
 - (9) Swadharmaning pacalang inggih punika ngawantu bandesa adat sajeroning ngardi kasutreptian miyah kasukrettaning desa adat sakala niskala. Ring sajeroning ngamargiang swadharma inucap pacalang patut nginggilang makudang-kudang pidabdab makadi ring sor :
 - ha. Ngalestariang miyah ngawrediang Agama Hindu;
 - na. Sayaga nitenin kasutreptian miyah kasukrettan desa adat;
 - ca. Sayaga jagra ring karahayuan wawidangan desa adat, krama desa adat rawuhing padruwean nyane, ngicenin pitulung prade katibenan bhaya lan nayubin krama desa adat, krama tamiu muang tamiu;

- ra. Mautsaha satata sumangdannya maka sami pangoreg desa adat inucap prasida satinut ring uger-uger/ kasukrettan sane manggeh ring desa adat;
 - ka. Ngamargiang swadharma tiosan sane kapatuduhang oih bandesa adat;
 - da. Ngamargiang pasangkepan pacalang sasampune masadok ring prajuru desa adat (bandesa adat);
- (10) Sumangdan nyane swadharmaning pacalang sidda kamargiang manut ring kapatutan nyane, pacalang taler madruwe kawenangan makadi ring sor :
- ha. Nampenin sakaluiring pisadok sane mawit saking krama desa adat mapakilitan ring wentene pracihna kabhyaparan ring wawidangan desa adat;
 - na. Mastikayang indik sangkan paraning bhyapara sane kasadokang;
 - ca. Prade sang sane ngardi bancana utawi kaparna pacang ngardi bancana kapanggihin, gumentos mastikayang wicaran nyane sang kacanidra patut katetes pangrihin salami sidda mastikayang nepek ring saksi, bhukti muang ilikitinan nyane;
 - ra. Ngamargiang swadharma sane tiosan mapakilitan ring pidabdbab kasutreptyan desa adat sane nenten ngalempasin uger-uger utawi awig-awig sane manggeh ring desa adat Tegalwangi;
 - ka. Pacalang desa adat Tegalwangi satata sayaga ngardinin pakilitan babawosan majeng ring pacalang desa adat tiosan napkala ngamargiang swadharma ngantos ngaliwatin wawidangan desa adat pamekas prade ngamargiang pakiyisan nganggra dina suci nyepi miwah acara-acara sane tiosan sane muatang linggih pacalang;

- (11) Pacalang napkala ngamargiang swadharma patut mabhusana jangkep bhusananing pacalang sane kategepin antuk piranti bhusana marupa keris utawi gagawan;

Palet 4

Indik Kulkul

Pawos 50

- (1) Kulkul utawi gendongan ring desa adat Tegalwangi kamanggeh- ang pinaka tanggur dadawuhan majeng ring krama adat miwah tanggur pracihna ngamargiang upacara yajnya;
- (2) Kulkul sane wenten ring desa adat Tegalwangi luir ipun :
ha. Kulkul pura utawi kahyangan;
na. Kulkul Desa/banjar;
ca. Kulkul Yowana;
ra. Kulkul Sekaa-sekaa;
- (3) Kulkul pura utawi kahyangan kawigunayang miwah kasuara- yang ritatkala :
ha. Patedunan krama adat pacang nyanggra piodalan ring pura;
na. Mararesik utawi mararisak ring palemahan pura;
ca. Napkala yajnya ring pura kamargiang antuk suara ngompang banban;
- (4) Kulkul desa adat utawi banjar adat kasuarayang napkala :
ha. Paruman krama desa adat, prade sangkepan wibaga utawi para baga kamargiang dadawuhan nganggen sarana media sosial (HP) utawi swalapatra;
na. Napkala wenten sinunggil krama kalayu sekaran (kapatian), mapawarangan/mawiwaha miwah rare embas;
ca. Napkala wenten panca bhaya;

- ra. Napkala ngamargiang pararesikan utawi gotong royong ring palemahan desa adat;
- (5) Tabuh tatepakan kulkul sane wenten ring desa adat makadi ring sor :
- ha. Tabuh tatepakan kulkul pura utawi kahyangan makadi ring sor :
- 1) Ngamargiang yadnya tatabuhan nyane ngompang banban (ndung-ndit adeng);
 - 2) Mararesik ring palemahan kahyangan tatabuhan nyane telung klentungan nyantet, kalanturan malih solas klentungan nyantet sada banban, kawewehin malih telung klentungan saha suara sane kaping untat wadon utawi suara ndit;
- na. Tabuh tatepakan kulkul desa adat makadi ring sor :
- 1) Paruman krama adat suara tabuh tatepakan nyane atulud banban (tigang klentungan nyambung, kalanturang malih solas klentungan banban,sada ngencengan katanggunin malih telung klentungan lan ping untat katimpalin suara wadon aklientung an/ tung tung tung, tung tung, tung tung ndit);
 - 2) Suaran kulkul kapatian kalih tulud banban nyambung (tung tung tung, tung 11x, tung 11x, tung tung ndit);
 - 3) Suaran kulkul atulud ngured banban (suara sane ping tiga ring unggur nenten kadagingan) maka cihna wenten rare embas utawi warga anyar;
 - 4) Suaran kulkul cihna bhaya (panca bhaya) suaran nyane bulus nenten nyukat galah saha katanggurin olih suaran kulkul tiosan.
 - 5) Napkala wenten suaran kulkul cihna bhaya sumangdan nyane sami krama adat medal

nganam- pekin suaran kulkul saha kategepin antuk gagawan manut bhaya miwah patut nginginutin pawarah pamucuk uning bhaya utawi prajuru sane patut ngenterang tan wenang mutus ngaraga;

- (6) Kulkul sekaa, kulkul pondokan miwah sane tiosan tan kawenangan nyawerin suara miwah sukat kulkul pura miwah kulkul desa adat;
- (7) Tan kawenangan nyuarayang kulkul sangkaning tan gumanti, prade wenten sapasira ugi malaksana kadi punika patut katetes munggwing tatujuon nyane nyuarayang kulkul (tiosan ring tengeran kulkul bhaya), yan kabhukti nepak kulkul sangkaning mamanah ngawi-awi, sang nepak patut keni pamidanda manut pararem;
- (8) Kulkul sane mapituas dadawuhan kawenangan kategepin antuk pamargi sane tiosan makadi pangarah, swalapatra, Whats App, miwah sakancan nyane sane mateges pamastika dadawuhan punika katampenin olih sane patut kadawuhin;
- (9) Kulkul sekaa-sekaa, kulkul paiketan miwah kulkul tiosan patut nyalaras ring drestha sane sampun mamargi lan manggeh saking rihin ngantos mangkin;

Palet 5

Indik Paruman

Pawos 51

- (1) Paruman miwah pasangkepan ring sajeroning nitipraja desa adat madruwe kasuksman uttama pisan sadwaning wantah megenah ring sajeroning paruman utawi pasangkepan pacang

prasida ngamedalang pamutus sakaluiring tatanan adat istiadat sane macampuh inggian sadagingin tata adat, budaya, agama, drestha miyah pidabdab-pidabdab sane anyar sida kamargiang olih krama desa adat;

- (2) Paruman miyah pasangkepan sane wenten ring desa adat Tegalwangi carcan nyane makadi ring sor :
- ha. Paruman agung krama desa adat Tegalwangi sane kamiletin olih maka sami krama adat makadi sabha desa adat saha angga jangkep, kertha desa adat jangkep, prajuru desa adat saha angga jangkep, para wibaga saha angga jangkep, pamangku kahyangan tiga, para sasepuh desa adat miyah krama desa adat mipil rawuh ka para yowana desa adat;
 - na. Paruman agung krama desa adat Tegalwangi kalaksanya yang napkala pacang mawosang indik :
 - 1) Nguwah-uwuhin awig-awig/maripurnayang awig-awig;
 - 2) Nitenin pawangunan ring kahyangan tiga miyah kahyangan panyungsungan desa adat tiosan ring sakuwub desa adat Tegalwangi;
 - 3) Nangun upacara yajnya sane uttama ring kahyangan desa adat Tegalwangi;
 - ca Paruman krama desa adat Tegalwangi sane kamiletin olih prajuru desa adat lan krama desa adat mipil sane kalak-sanayang ngasasih apisan mawosang indik pamargin tata adat sajeroning asasih lan awarsa;
 - ra. Pasangkepan para baga kalaksanayang sanisthane tigang sasih apisan sane kamiletin olih prajuru desa adat, sabha desa adat, kertha desa adat miyah manggalaning para baga sane wenten ring desa adat Tegalwangi mawosang indik sakancan pangrancana pawangunan sane pacang kapidabdabin tur pacang

- katunasang pamutus sajeroning paruman desa adat sane kamargiang ngasasih;
- ka. Pasangkepan para baga, sekaa-sekaa, paiketan-paiketan miwah pasangkepan pacalang;
 - da. Pasangkepan krama istri kalaksanayang ngasasih apisan mawosang indik midabbin sahananing acara sane gumanti dados amongan para istri pinaka rabin krama desa adat utawi banjar adat miwah nekekan pakilitan wibaga para istrine;
- (3) Paruman krama desa adat kalaksanayang ngasasih apisan manggeh taler pinaka pasangkepan krama banjar adat mawosang saparindikan pidab dab adat-istiadat sane mamargi sajeroning asasih;
- (4) Pasangkepan para yowana desa adat Tegalwangi kalaksanayang nem (6) sasih apisan mawosin saparindikan kasukrettan yowana miwah tataning kayowanen sane patut kamargiang pinaka anak-anaking krama desa adat;
- (5) Paruman utawi pasangkepan padgatakala kamargiang manut pabuat;

Pawos 52

- (1) Parikrama sane patut kainggil satunggil ngamargiang parum- an utawi pasangkepan krama desa adat/krama banjar adat patut satatanguttamayang bantang sasuluh muang sasuduk makadi ring sor :
- ha. Pawangunan tri hita karana;
 - na. Panglinaksanan tattwa agama Hindu, sasana miwah acara (upakara-upacara);
 - ca. Nababin utsaha sane sidda ngardi kasukrettan desa adat, banjar adat, sekaa-sekaa, paiketan miwah sakancan nyane;

- ra. Ngawangun pakilitan krama desa adat lan sasamaning umat sadharma;
 - ka. Satata mapagamel ring kasuksman adat, budaya, agama, dresta miyah widya sastra sane mawiguna ring sajeroning ngawrediang desa adat;
 - da. Dharmaning agama miyah dharmaning nagara;
 - ta. Tan wenang angulahaken sukaning idhep tan ton laraning wong len;
 - sa. Paras paros sarpana ya, gilik-saguluk, nginggilang pang-unadhika bhyuhing wiguna boyo suryak siyu;
 - wa. Tan wenang dengkak - dengkik (ujar abhregas), saling simbing, saling tuding miyah sakancan nyane;
- (2) Prade wenten sinunggil krama malaksana tan patut, mamunyi pati kacuh nemah mamiluh muang dengkak-dengkik ring paruman, krama sane malaksana inucap patut kadanda keni biya pacamamil agung alit nyane manut pararem saha krama inucap ngaksama nunas pangampura ring sajeroning paruman krama desa adat;
- (3) Pamutus sane kamedalang ring sajeroning paruman kamanggeh ang pinaka panegul pikahyun krama, tan kapatutang ngawi-carayang pamutus sane sampun kamanggehang gumantin nyane patut kalaksanayang;
- (4) Pamutus sane kamedalang ring sajeroning paruman desa adat patut mapiranti utawi mapagamel ring kasuksman tata adat boyo madasar pikamkam tatanan sane tiosan;
- (5) Pamutus sane kamedalang ring paruman desa adat prade pungkuran ngawetuang wicara sangkaning kapurug patut katepasin nganggen dasar ilikita hukum adat boyo hukum pidana, prade mapakilitan ring kretta samaya kangkat kapuput-ang sajeroning kaperdataan;

- (1) Tatacara ngamargiang paruman utawi pasangkepan kamanggeheng makadi ring sor :
- ha. Sadurung paruman kakawitin patut sampun kacumawis-ang dudonan acara pinaka daging paruman;
 - na. Paruman utawi pasangkepan kamargiang patut kakawitin antuk ngamargiang upacara pangastuti majeng ring Ida Bhatara Sedahan Penyarikan pinaka panghuluning genah paruman;
 - ca. Paruman kaenter olih juru utawi pangromba prajuru adat;
 - ra. Sadurung mungkah patut kamanggala antuk sasapan pangastungkara panganjali umat " Om Swastyastu ";
 - ka. Sasampun paruman inucap kakawitin antuk sasapan pamungkah rarisi kalanturang dening acara nuduk dadosan ayah-ayahan, paturunan miwah pacingkreman sane madruwe amongan swadharmane inggih punika panyarikan desa adat kawantu olih kasinoman bulanan;
 - da. Indik pamargi nyacah krama ring pangawit paruman kangkat kamargiang masarana absen utawi daftar krama adat sane malingga tangan sane kamargiang saking pangawit paruman;
 - ta. Gumentos dudukan paridana prasida kawilangin, galah paruman kadagingin pawarah-warah utawi piuning olih bandesa adat sane dagingnyane makadi ring sor :
 - 1) Kamanggala atur antuk panganjali umat " Om Swas-tyastu";
 - 2) Nguningayang saparindikan program pawangunan sane prasida kalaksanayang miwah sane tan prasida kamargiang ring sajeronning asasih ngantos paruman inucap kamargiang kawewehin antuk

- pikamkam muputang pakaryan sane mengpeng kamargiang;
- 3) Nguningayang saparindikan prabea pawangunan miwah kawentenan paridana kas desa adat sajeroning asasih rawuh dina paruman lumaksana;
 - 4) Nguningayang paweweh acara tiosan ring sane gumanti pinaka babuatan adat miwah sane marupa swadharma mawit saking guru wisesa miwah pakilitan desa adat tiosan;
 - 5) Nguningayang pidabdab sane pacang rawuh;
 - 6) Kauntatin antuk ngaturang parama santih;
- sa. Sasampun dudukan paridana prasida kawilangin kalan-turang antuk nyarca kawentenan paridana desa adat sane kaonek ring sajeronin naraca paridana kas desa adat sane kamongin oih patengen desa adat;
- wa. Sasampun prasida kalaca-laca parindikan prabea sane mamargi ring sajeroning asasih ring naraca kas desa adat, irika pacang makanten indik kawentenan paridana kas desa adat sane pastika kantun madruwe jinah napi utang sane kadruwenan;
- la. Indik kawentenan paridana sane sampun kalaca-laca sajeroning naraca prabea punika sane kauningayang oih juru raksa saha katunasang pamutus majeng ring krama desa adat sumangdan nyane padruwen desa adat prasida sah sane kamanggala oih bandesa adat;
- ma. Kalanturang antuk acara usul-usul utawi pataken;
- ga. Kalanturang antuk nyacah krama pamuput paruman;
- ba. Paruman kapuputang sane kaenter oih juru utawi pangromba desa adat antuk sasapan parama santih;

Pawos 54

Paruman utawi pasangkepan prasida kalaksanayang prade sampun makadi ring sor :

- (1) Krama desa adat sane patut ngamiletin paruman utawi pasang-kepan prasida ngarawuhin saparon nyane utawi apah tengaa;
- (2) Dadawuhan pacang ngamargiang paruman utawi pasangkepan patut kariyinin antuk suaran kulkul;
- (3) Pamilet paruman utawi pasangkepan mabhusana adat madhya;
- (4) Piranti paruman kaniskala kategepin saranan nyane antuk cane;
- (5) Panyacah krama kamargiang ring pamuput paruman;
- (6) Krama adat sane ngangganin paruman prasida ngamedalang babawosan utawi daging pikahyunan prade kabuatang olih manggalaning paruman, prade tan kabuatang tan wenang ngusul;

Palet 6

Padruwen Desa Adat

Pawos 55

Padruwen desa adat Tegalwangi luir ipun :

- (1) Pura kahyangan tiga desa adat Tegalwangi makadi ring sor :
 - ha. Pura Puseh, Pura Desa/Bale Agung, Pura Masceti;
 - na. Pura Dalem, Pura Prajapati;
 - ca. Pura Malanting, Sedahan Panyarikan;
- (2) Jempana, pratima, pralinggan Ida Bhatara;
- (3) Bale Banjar desa adat Tegalwangi;
- (4) Setra desa adat Tegalwangi;
- (5) Tanah pakarangan desa adat (PKD);
- (6) Tanah karang ayahan desa adat Tegalwangi;
- (7) Tanah labha pura;
- (8) Labda Pacingkreman Desa Adat (LPD);

- (9) Bhaga Utsaha Desa Adat (BUPDA);
- (10) Uparenggan Pura panyungsungan desa adat, bhusana paling-gih;
- (11) Karawitan/ Gong siki barung;
- (12) CBD;
- (13) Kulkul desa adat
- (14) Sane durung kaonek utawi kasurat ring awig-awig puniki pacang kajangkepan ring panyacah awig;

Pawos 56

- (1) Prajuru desa adat patut ngenterang lan nudonang saparindikan labha sane marupa tanah padruwen desa adat;
- (2) Pikolih lan pamupon labha padruwen desa adat ngaranjing dados pikolih utawi paolih-olihan desa adat utawi paweweh kas desa adat;
- (3) Sakaluiring padruwen desa adat sane marupa labha utawi tanah patut kajangkepin antuk ilikitan nyane (sertifikat);
- (4) Labha padruwen desa adat sane marupa carik utawi panegalan prade kaplagayang utawi kasakapang/ kasewayangkangkat nganggen gaguwat kretta samaya (perjanjian) nginutin tata titi kaperdataan sampunang ngantos kakedeng ngaranjing ring paundukan pidana (kelidin/hindari);
- (5) Krama desa adat miwah prajuru desa adat patut pratyaksa majeng ring padruwen desa adat;
- (6) Tan kawenangan ngesahang, malipir, ngadol miwah sakancan nyane padruwen desa adat, prade wenten malaksana kadi punika patut keni pamidanda manut pararem;
- (7) Krama desa adat utawi sapa sira ugi sane kapangluh mamaling padruwen desa adat patut keni pamidanda manut pararem saha ngawaliang sane kapaling kadesa adat utawi ring genah sane kapandung;

- (8) Krama desa adat sane madruwe babuanan pacang mapinunas sane wenten ring padruwen desa adat patut masadok ring prajuru desa adat/Bandesa adat sida tan sidane kaputusang olih prajuru desa adat/bandesa adat;
- (9) Sakaluirning genah utawi kawentenan ring sajeroning kakuwub desa adat Tegalwangi sane prasida mawiguna pinaka dasar mapaweweh ring kasukrettan miyah kajagadhitan krama desa adat makadi suwukan toya utawi talebutan toya (sumber toya/air) patut kaprathyaksa lan katitenin miyah kapolahang wigunan nyane;
- (10) Sakancan utsaha sane kawangun olih desa adat mapituas ring pidabdab pacang nincapang hasil (peningkatan ekonomi) patut kategepin antuk ilikitan nyane sane marupa pararem;

Pawos 57

Paolih - olahan desa adat luir ipun :

- (1) Urunan krama desa adat/paturunan krama desa adat;
- (2) Wantuan saking guru wisesa;
- (3) Cacukuh pahan labha saking LPD, BUPDA;
- (4) Punia utawi sumbangan saking sapa sira ugi sane patut;
- (5) Sasarin canang;
- (6) Pamupon labha padruwen desa adat;
- (7) Cukai dagang miyah sasamen nyane;

Pawos 58

Panyanggran Adat

- (1) Krama desa adat utawi sapa sira ugi sane madruwe karya utawi upacara kasukan kangkat nunas pakaryan ring krama adat jangkep utawi nuju-nuju;
- (2) Krama adat sane madruwe kabhyaparan kalayu sekaran patut kasanggra olih krama desa adat sajeroning pakaryan makadi ring sor :

- ha. Nyanggra ngaryanin eteh-eteh pratekaning wong lampus/kapatian makadi papaga utawi panusangan, ante, tumpang salu lan sane tios-tiosan;
- na. Napkala upacara nyiraman layon krama adat nodia ring sang kalayuan;
- ca. Nyanggra pakaryan napkala mamargi kasetra ngantos mapendem utawi mageseng, prade mageseng panyang-gran krama adat puput sasampun layon punika ngawit kageseng, salantur nyane katutugang olih pasametonan nyane;
- ra. Panyanggran krama adat napkala upacara kalayuan pangingun nyane sakasidan antuka olih sang madruwe kalayuan;
- ka. Krama adat nyanggra upacara kalayu sekaran patut mapagamel ring kasuksman dharmaning matulung miwah lascarya;

Palet 7

Pawiwahan

Pawos 59

- (1) Pawiwahan mateges marabian, alaki rabi, mapikuren, matemutangan, nganten artin ipun patemon, paiketan lanang kalawan wadon (purusa-pradhana)madasar antuk manah suka-citta, lulut-asih, tresna asih, sane matatujon ngawangun kulawarga anyar saha kadulurin antuk upacara panyucian patemon jangkep dening tri upasaksi (manusa saksi, bhuta saksi miwah dewa saksi);
- (2) Pawiwahan ring dasa adat Tegalwangi prasida lumaksana prade sampun nginutin paugeran yusa sandang marabian miwah sampun kapatutang olih kasukrettan guru wisesa (Undang-undang Perkawinan;

- (3) Manut drestha pawiwanan ring desa adat jejer ngamanggehang dharmaning kapurusan (patrilineal), pungkuran pacang mapa-kilitan ring swadharma miwah sasumbahan lan kramaning mipil ring desa adat;
- (4) Sane ngamargiang pawiwanan patut nginutin uger-uger makadi:
- ha. Sampun munggah daha taruna tur sampun ngaranjing ring sekaa taruna utawi dados yowana desa adat;
 - na. Manut ring Undang-undang perkawinan tur ngamolihang akta perkawinan;
 - ca. Ngalaksanayang upacara sudi wadhani prade tios ring agama Hindu;
 - ra. Pawiwanan nyane jangkep saha tri upasaksi;
- (5) Tatacara ngamargiang pawiwanan makadi ring sor :
- ha. Papadikan inggih punika tatacara ngalaksanayang pawiwanan nginutin laksana makadi ring sor :
 - 1) Masedek utawi nyedek mateges sang pacang ngalap rabi (purusa) kasarengin yayah renan nyane matemu wadhana sareng sang pradana (wadon) taler kasarengin yayah renan nyane ayat pidabdabe mangda saling kauningin sang pacang mapikuren pungkuran (ngaraketan pikamkam makumanyama) saha mapaiguman nyumponin indik galah patemone sane lagi rawuh pacang mararasan;
 - 2) Ngaluku utawi mararasan mateges kulawarga sang purusa kasarengin antuk pasametonan nyane ngawentenan paguneman malih sane kaping kalih kalawan kulawarga lan pasametonan sang pradhana ayat pidabdabe ngamargiang pararasan nyantenan munggwing tatujon sane pacang katuluh olih sang purusa sane sampun pada lulut asih

- kalawan sang wadon, saha kadulurin antuk upasaksi niskala marupa upakara pangrawos (banten pangrawos);
- 3) Ngarangkat utawi amet pinet mateges sang purusa ngambil sang pradhana kabakta kadunungan sang purusa sane kariyinin antuk pararasan saling druwenang miwah amet pinet saking manggala adat lan dinas sapisanan pinaka manusa saksi;
- na. Ngarorod utawi marangkat inggh punika tatacara pawiwahan kalaksanayang antuk pamargi pangambilan sang wadon saking sasiliban lumbrah kabawos mamaling nyambatang, pamilakun nyane makadi ring sor :
- 1) Sadurung wenten pidabdab pacang maadungan ring kulawarga sang pradhana, sang wadon sane pacang mawiwaha sampun kaplaibang olih sang purusa kagenahang ring genahe sane singid boyo kadunungan sang purusa;
 - 2) Sadurung langkungan ring adina (24 jam) patut sampun wenten utusan ngarawuhin kapatutan kulawarga pradhana sumangdan nyane nenten wenten sane ngetut wuri inggian lampah sang pradhana mapagamel antuk swalapatra mastikayang sang makalihan ngarorod sangkaning pada suka citta, seneng pada seneng, liang pada liang tur mangda sampunang malih kawicarayang, utusan sane patut ngarawuhin kulawarga sang pradhana punika sinunggil kulawarga purusa kasarengin antuk manggala dinas (kepala dusun) saha makta sundih utawi suar;
 - 3) Ngaluku utawi mararasan kadulurin antuk upasaksi niskala pamargine pateh makadi ngaluku papadikan miwah ring galahe puniki kangkat

- sapisanan kamargiang majauman sakemawon patut kajangkepin antuk manusa saksi saking manggala adat miwah dinas sane pacang nyaksiang sang kesah mapikuren lan ngaranjing pinaka warga anyar ring wawengkon adat miwah dinas;
- ca. Pawiwanan nyeburin utawi nyantana mateges sane wadon/istri manggeh pinaka purusa tur sane lanang manggeh pinaka pradhana, panglinaksanan nyane patut sane lanang rawuh/makisid kadunungan sang maraga pradhana, inggian pamilakun nyane ring pamargi juang-kajuang pateh makadi papadikan utawi ngarorod;
- ra. Pawiwanan pada gelahang nenten kabawosang ring sajeroning uger-uger desa adat Tegalwangi, sakemawon prade mawetu wenten pidabdab makadi asapunka saparindikan nyane kasuksara ring sang pacang ngamargiang pawiwanan, sanisthane matatimbang ring prajuru desa adat;
- ka. Pawiwanan paselang miwah pawiwanan mapadanaan ngawit warsa 1951 sampun kapucehang tur nenten kamargiang malih sadwaning makanten makadi tan manut ring sasananing kamanusan manut agama Hindu miwah ngamargiang pawiwanan nginutin kramaning madagang-dagangan lan matuku-tukuan raris mawetu makadi nyurudang wigunan kamanusane;

Pawos 60

- (1) Pawiwanan sane kalaksayang olih krama Hindu sareng umat magama tiosan ring umat Hindu patut kajangkepin pawiwanan nyane antuk ngalaksayang upacara sudiwadhani sane kasaksinin olih Parisada Hindu Dharma;

- (2) Prade ring desa adat Tegalwangi sinunggil krama wenten ngamargiang pawiwanan nginutin tatacara ngarorod, patut katepasin antuk panglinaksanan makadi ring sor :
- ha. Prade sane ngarorod krama adat sane wadon patut kaprattyaksa rihin sakaluir pamilakun nyane olih sang madruwe wong wadon inucap;
 - na. Masengker adina (24) jam prade durung wenten cihna patinglas pamilaku, sang madruwe kapatutan wadone patut masadok ring prajuru adat madrwe rasa kaicalan (sinunggil kulawargan nyane ilang);
 - ca. Sasampun wenten pasadok ical wawu kamargiang kramaning masaserep kaicalan daha sane kamiletin olih sane madruwe daha inucap kasarengin antuk bandesa adat (sinunggil prajuru), manggala dinas miwah sinunggil pacalang;
 - ra. Tatacara masaserep tan kawenangan ngamargiang pari-laku nyapa kadi aku utawi lempas ring sasana manut adat-istiadat;
 - ka. Prade sadurung masengker adina (24) sampun wenten pasedek miwah atiti kraman nyane manut ring tata adat, dharmaning masaserep punika nenten kamargiang malih;

Pawos 61

- (1) Tatacara ngamargiang pasededekan ring pawiwanan ngarorod makadi ring sor :
- ha. Utusan kulawarga purusa kabih olih manggala dinas miwah pacalang;
 - na. Makta suluh, sundih miwah pracihna marupa pangeling utawi swalapatra sane kalingga tanganin sang makalihan (lanang-wadon) nyantenang sang makalihan pada arsa, pada liang pada salulut asih;

- ca. Sane katuju olih utusan wantah dunungan manggalaning dinas kakuwub sang wadon saha nyarengin rawuh kadunungan kulawarga sang wadon;
- ra. Napkala sampun kacunduk utusan lanange majeng ring sang madruwe wadone saha sampun sida nyukserahan bhukti sang makalihan utawi sampun sida ngokasan pajantenan wadone, sasampun punika tan kawenangan wenten babawosan utawi pabligbagan malih, patut sami pada rena sambilang mapikahyun, wus punika maselat adina utawi tigang dina wawu kalanturang malih ngawen-tenang rembug saparindikan nyane ring kulawarga makalihan;
- ka. Cumpu tan cumpu ring pamargine sane kaambahin olih sang malaksana parorodan, kulawarga purusa patut nyewaka ngandap kasor ngarawuhin dunungan sang pradhana gumantin nyane mapituas ngalanturang sapola-pali pamargi pawiwanan sane pacang kamargiang pungkuran;

Palet 8

Palas Marabian utawi Nyapian

Pawos 62

- (1) Palas marabian utawi nyapian inggih punika krama utawi sapasira ugi sane sampun mawiwaha utawi sampun ngamari-giang kramaning alaki rabi sangkaning mawetu wenten wicara matemahan nenten adung malih tur sang makalihan sampun nenten saumah malih (mapalasan) saha sang makalihan sampun ngalaksanayang pamargi makadi ring sor :
 - ha. Masadok ring prajuru adat sang makalihan pacang pasah marabian;

- na. Sampun kamargiang kramaning kasukkrettan wit saking guru wisesa sane kabhuktiang antuk ilikita marupa akta perceraian;
 - ca. Sane wadon sampun mulih bajang;
 - ra. Sasampune pada cumpu pacang mapalasan kalanturang maupasaksi sakala niskala ring pura desa/bale agung karuntutin antuk ngawaliang suaran kulkul lan kasobyahang ring paruman desa adat;
 - ka. Prabea upasaksi upacara miwah ngawaliang suaran kulkul katangganing olih sang makalihan agung alit upacara miwah panukun kulkul punika manut ring pamutus prajuru;
 - da. Prade makasami pamarginne puniki sampun prasida kamargiang wawu kabawos nyapian;
- (2) Palas marabian utawi nyapian sangkanin wicara prasida katam-penin yaning wicaran nyane masulur makadi ring sor :
- ha. Prade wicarane katumusang olih sang maraga lanang, sane wadon kacihna malaksana makadi ring sor :
 - 1) Sang wadon mabhukti malaksana paradara makadi anasar laku;
 - 2) Mawali kaumah bajang langkungan ring tigang sasih nenten wenten wiwilan nyane;
 - 3) Nenten nyanggamen salami mapikuren;
 - 4) Nenten ngalaksanayang kramaning alaki rabi miwah nenten ngawetuang santana;
 - 5) Mambek duracara ring agama Hindu tur ngarereredan wibhawan kulawarga purusa;
 - na. Prade wicarane katumusang olih sang maraga wadon/pradhana patut lanange wenten cihna laksana makadi ring sor :
 - 1) Lanange mabhukti malaksana duracara miwah paradara;

- 2) Mambek bringas, bragedegan mawastu wadone kabhyaparan (KDRT);
 - 3) Nenten nyanggamen salami mapikuren;
 - 4) Nenten ngupajiwu kadi kramaning sang alaki rabi salami mapikuren;
 - 5) Nyolong samara sane mapiteges ngarabinin wong sane sampun marabian utawi sang durung maparabian (selingkuh);
- ca. Risampune palas marabian sang mawak pradhana patut ngaturang bhakti upasaksi papamit ring genah suci sang maraga purusa taler mapiuning ring sanggah duk bajang ngokasang pikarsane mawali kaumah bajang;
- ra. Sang manggeh mawak pradhana patut ngawirang indik pabekel tatadan duk mawiwaha miwah paguna kaya parabian patut pah kalih;
- ka. Santana sane kakardinin patut kupapira olih yayah renan nyane (santana tan wenang kepah sakantun maraga rare, prade sampun duwur manados kawenangan sang putra jaga nginut sira, sakemawon pangupajiwani nyane teteg manggeh sang makalihan);
- (3) Prade riwekasan sang palas marabian adung malih tur pacang nginkinan parabian malih, pidabdabe patut makadi ring sor :
- ha. Ngalaksanayang pawihahan makadi patut manut drestha lan sastra agama Hindu;
- na. Ngamargiang tatacara pawihahan sane kasungkemin makalihan;
- ca. Masamaya ring ajeng kulawarga kaupasaksi prajuru adat nenten pacang nguwak utawi ngalurug kasukrettan sane manggeh ring desa adat, prade linjok ring samaya kadanda nikel ping kalih manut pararem;
- ra. Sang palas marabian sasampune puput wicaran nyane miwah sampun ngalaksanayang pamrayascitta ragha

- ring sanggah kabuyutan nyane kawenangan ngaranjing ring kahyangan desa;
- ka. Sang sane palas marabian ring desa adat sane wadon patut kaparoban ring kulawargan nyane lan sane lanang patut kamanggehang pinaka krama balu, sadwaning sampun nahenin dados krama adat jangkep;
- (4) Sang palas marabian sangkaning silih sinunggil lampus kawastanin balu;
- (5) Bacakan balu wenten kakalih inggih punika balu muani kapurusa (wit santana purusa) miwah balu muani boyo kapurusa (purusa nyeburin);

Palet 9

Indik Santana

Pawos 63

- (1) Santana inggih punika katurunan utawi panglantur kahuripan;
- (2) Santana kaepah dados kalih soroh luir ipun :
- ha. Pratisantana (pianak buah basang);
- na. Santana paperasan (pianakmawit sangkanin upacara pamerasan);
- (3) Pratisantana mateges santana sane mawetu/medal/embas saking sangkaning pawiwahan;
- (4) Santana paperasan mateges santana sane kawentenang mawit sangkaning mameras, ngangkat miwah sakancan nyane sane kamanggehang pinaka pratisantana madasar upasaksi lan ilikita sane nginutin kasukrettan adat lan kadinasan (pengadil-an), punika taler prade sane kaperas kadegang santana tios agama patut kategepin antuk upacara sudiwadhani;

Pawos 64

- (1) Manut kasukrettan adat lan drestha sane wenang kaperas utawi kadegang pinaka santana paperasan luir ipun :
 - ha. Kauttamayang sane kantun ring sajeroning tunggal sanggah, pamrajan, paibon lan salantur ipun nginutin turunan wit kulwarga purusa ngamunggahang;
 - na. Prade tan ngamolihan sangkaning wit purusa kangkat sangkaning wit pradhana nginutin turunan kasamping;
 - ca. Prade nenten polih makadi aksara "ha , na" ring ajeng, wenang sakama-kama sane kacumponin sakemawon sane magama Hindu;
 - ra. Prade nenten ngamolihang sane magama Hindu kangkat kanggen santana rajeg mawit saking agama tiosan ring Hindu sakemawon patut nginutin uger-uger makadi ringsor :
 - 1) Manut ring tata - titi adat sane kapramananing olah Agama Hindu;
 - 2) Nginutin uger-uger saking guru wisesa utawi kadinasan pamekas pamutus pangadilan miwah ngamolihang akta capil;
 - 3) Upacara sudiwadhani;
- (2) Pamerasan santana, pangangkatan santana, ngadegang santana rajeg patut kadasarin antuk pidabdar kasumuyuban kulawarga, pamekas kulawarga batih utawi inti saha karembayang sareng prajuru adat dwaning pungkuran sasampun santana sane karajegang inucap pacang mapakilitan ring tata adat-istiadat;
- (3) Ngadegang santana rajeg utawi mameras santana, ngangkat santana pinaka dharmaning kahuripan sane patut kalaksanayang olah sapasira ugi madruwe pidabdar ngajegang kulawargan nyane tur prasida ngalantur kapungkur wekas;

- (4) Sapa sira ugi tan kawenangan ngalangin, ngandeg, utawi nyangkalen sang pacang ngadegang santana rajeg, mameras santana, ngangkat santana yaning sampun madasar manah rahayu lan madruwe tatujon sane pastika saha mrasidayang nyaropenin kahuripan nyane rawuh kapungkur wekas;

Palet 10

Indik Warisan

Pawos 65

- (1) Sane kabawos warisan inggih punika sahananing tatamian sane katinggalang olih kaluhurania katiba ring pratisantanan nyane;
- (2) Manut ring tata adat-istiadat sane manggeh ring Bali sane magaguat Agama Hindu, warisan sane marupa tatamian inucap wenten kalih (2) soroh luir ipun :
- ha. Warisan utawi tatamian sane marupa ayah-ayahan kahuripan sakala niskala;
 - na. Warisan utawi tatamian sane marupa artha brana mawiguna pinaka panglantur kahuripan makadi carik, tegalan/ladang, mole-mole, sasepelan jinah (tabungan), miwah sakancan nyane :
- (3) Warisan utawi tatamian sane marupa swadharmaning kahuripan sane tan wenang linjokang makadi utang - piutang, graha miwah sanggah, marajan, sakaluiring genah suci druwen panyungsungan kulawarga sane ngawarisang;
- (4) Warisan punika katiba majeng ring turunan utawi pratisantana sane kamanggehang pinaka tegak purusa, dwaning ring tata kramaning adat Bali sane kacihnayang napkala pawiwanan manut drestha tur kamanggehang rawuh kamangkin wantah kajenekan utawi kajejeran purusa pinaka panglantur kahuripan miwah adat - istiadat;

- (5) Prade ring kulawarga madruwe panampi warisan langkungan ring adiri, pah nyane patut sami polih sane pateh, tan wenang mabinayan, sajawaning warisan pabekel tatadan miwah pagunakaya;
- (6) Panampi warisan utawi ahli waris kengin tan polih warisan prade maparilaku :
- ha. Santana rajeg kesah mawiwaha;
 - na. Ninggal kadaton;
 - ca. Ninggal sasananing magama Hindu nginutin agama tios;
- (7) Warisan wawu dados kepah prade :
- ha. Sane madruwe warisan sampun lampus;
 - na. Sampun puput kamargiang upacara pitra yajnya;
 - ca. Utang piutang sane madruwe warisan sampun buntas katawur sakala niskala;
- (8) Krama desa adat sane ngalinggihin karang ayahan desa adat prade nenten madruwe ahli waris jaga ngayahang karang ayahan desa adat inucap patut mawali kadesa adat salantur ipun katebahang ring krama desa adat sane tiosan sane patut ngayahang adat;
- (9) Krama desa adat sane ninggal kadaton utawi sane nenten nginutin tata adat, budaya, Agama Hindu lan drestha (catur drestha), karang ayahan nyane patut mawali kadesa adat;
- (10) Santana sane boyo pratisantana utawi kabawos ahli waris kengin muponin warisan sane marupa artha brana makadi carik, tegal miwah sane lianan prade :
- ha. Santana luh utawi wadon sane nenten kesah mawiwaha;
 - na. Balu luh miwah balu muani/lanang nyeburin;
- (11) Jiwadhana, dhana paweweh, bekel sang rumaga pradhana tan wenang kepah sajeroning padum warisan dwaning ngaranjing ring kakuwub dhana raksa sang kaweweh;
- (12) Krama desa adat sane ninggal kadaton utawi ninggal sasana tan kawenangan nganggen, migunayang ngawalatkara saparin-

dikan sane mapakilitan ring adat-istiadat, agama Hindu, dresta, simbol utawi niasa sane manggeh ring tata adat lan agama Hindu;

SARGAH LIMA
SUKRETTA TATA PALEMAHAN

Palet 1

Indik Karang, Tegal, Carike Miwah Setra

Pawos 66

Saparindikan karang desa adat katitenin makadi ring sor :

- (1) Karang Desa Adat Tegalwangi kephah dados kalih soroh inggih punika karang desa adat miwah karang ayahan desa adat;
- (2) Karang desa adat inggih punika karang sane kantun kawigunayang olik desa adat sajeroning nabdabin saparindikan adat istiadat, budaya, agama Hindu miwah drestha (catur drestha) sane kantun manggeh lan sida kamargiang rawuh kamangkin;
- (3) Karang ayahan desa adat inggih punika karang desa adat sane sampun kasukserahang majeng ring krama desa adat sane kawigunayang pinaka genah krama madunungan miwah mawiguna kanggen pagenjahan kahuripan rawuh kapungkur wekas;
- (4) Karang desa adat, karang ayahan desa adat patut madruwe ilikita sane marupa sertifikat padruwen desa adat;
- (5) Karang ayahan desa adat nenten dados kawigunayang tiosan ring pinaka genah pagenjahan kahuripan, nenten dados kadol, tan wenang kagentosin kajenekan nyane, prade piwal sang sane nunggunin karang ayahan inucap keni pamidanda manut pararem;
- (6) Karang ayahan desa adat gumanti wenang kawarisang majeng ring santana kapratisantana turun katurunan nyane mawiwit saking sang sane kajenekan pangawit;

- (7) Karang desa adat, karang ayahan desa adat sane sampun kadunungin olih krama desa adat patut sumeken lan tinglas pawatesan nyane;
- (8) Sapa sira ugi tan kawenangan ngalah-alah pawatesan karang desa adat, karang ayahan desa adat, prade wenten sane ngalurug indik kasutreptyan sane manggeh ring pawatesan karang desa adat lan karang ayahan desa adat patut keni pamidanda manut pararem;
- (9) Ngawangun wates ring karang desa adat miwah karang ayahan desa adat kangkat kanggen antuk pagehan, tembok utawi paal wates sane mawit saking BPN, prade kasidan antuk mangda sampunang nganggen tanem tuwu, sanisthane patut nganggen pagehan;
- (10) Manut drestha maka sami karang ayahan desa adat mapamesu-an karurung, ring pakibeh jagate sane ngalimbak utsahayang sampunang ngantos wenten karang ayahan desa adat sane kali-nggihin olih krama desa adat mawetu dados karang kabebeng;
- (11) Pangeahan karang ayahan desa adat ring sajeroning sikut satak kasuksara ring sang sane ngalinggihin karang inucap saha kasungkemin olih pangoreg maka sami sane wenten ring sajeroning karang inucap tur tan kawenangan ngamanggehang sulur nyapa kadi aku napkala ngamargiang pangeahan karang inucap;
- (12) Karang desa adat, karang ayahan desa adat patut kupapira sakala niskala;
- (13) Karang padruwen desa adat miwah karang ayahan desa adat patut satata inggil karasmian nyane miwah kabresihan nyane;

Pawos 67

Kramaning indik tegal miwah carik katitenin lan kasulurang makadi ring sor :

- (1) Sane kawastanin tegal, panegalan utawi ladang inggih punika widang palemahan sane wenten ring kakuwub utawi wawidang-an desa adat Tegalwangi sane kawigunayang pinaka genah matatanduran tanem tuwuh miyah sarwa prani sane arang ngamolihang toya pinaka pabasah napkala matatanduran utawi kantun nganggen pabasah palemahan sangkaning tedun sabeh sanisthane polih toya apah tiga anggen nguripang sarwa entik-entikan; (palemahan tada sabeh);
- (2) Sane kawastanin carik, sawah, bangket inggih punika palemah-an utawi widang palemahan sane wenten ring kakuwub utawi wawidangan desa adat Tegalwangi sane kawigunayang pinaka genah matatanduran utawi mapamula-mulaan sahananing sarwa prani sane muatang pabasah toya sajangkep nyane manut ring kasukrettan tatanduran inucap makadi taneman padi utawi pantun (phala gantung, phala bungkah) miyah sahananing biji-bijian miyah sakancan nyane;
- (3) Tegal, panegalan, carik utawi bangket patut pastika wates nyane;
- (4) Indik pawatesan tegal utawi panegalan miyah carik, sawah utawi bangket kantun nginutin drestha sane manggeh makadi mapawatesan nganggen sarana jalinjingan utawi telabah, cacir-en entik-entikan, margi pundukan miyah drestha anyar ngang-gen paal wates saking BPN;
- (5) Prade kawentenan palemahan panegalan miyah carik utawi bangket inucap marupa punden maundagan makanten makadi soyor ngalabak, tatacara pangupapiran nyane patut nginutin gaguat magaleng kateben, teges ipun wates sane wenten ring tebenan patut kupapira olih sang sane madruwe sawah utawi carik miyah tegal baduwuran, sane madruwe carik miyah tegal ring soran tan wenang ngusak-asik wates inucap;

- (6) Tan kawenangan ngalah-alah pawatesan tegal miwah carik, sapasira ugi sane mamurug patut keni pamidanda manut pararem;

Pawos 68

- (1) Krama desa adat sane madruwe sawah, bangket miwah tegal utawi panegalan patut ngaranjing saha nginutin tata titi lan kasukrettan subak manggeh pinaka angga subak basah (carik) sane madruwe carik utawi bangket miwah subak abian krama sane madruwe tegal utawi panegalan;
- (2) Tata sulur lan tatacara sane kamargiang ring sajeroning kasukrettan miwah kasutreptian migunayang swagina ring carik, bangket miwah tegal utawi panegalan kawarah ring sajeroning pararem utawi awig-awig subak (pararem/ awig-awig subak basah/yeh miwah pararem/ awig-awig subak abian);
- (3) Kasukrettan indik tata titining ngupapira carik miwah panegalan nginutin cacukuh utawi pakem sane manggeh ring sajero-ning susastra sri tattwa, gelagah puwun, dharma pamaculan miwah sakaluiring pawarigan sane mapakilitan ring pabangket-an miwah panegalan;
- (4) Ring sajeroning palemahan sawidangan carik miwah tegal patut kawangun genah suci pinaka panghuluning carik miwah tegal sane lumbrah kabawos pangalapan saha kawangunan palinggih genah ngarcana dewaning carik miwah tegal;
- (5) Kasutreptyan pangupapiran sane jangkep patut katitenin ring sajeroning pararem/ awig-awig subak yeh miwah pararem / awig-awig subak abian, panglinaksanan nyane prade wenten krama subak sane mamurug patut keni pamidanda manut putusan pararem krama subak;

Pawos 69

Parindikan setra katitenin makadi ring sor :

- (1) Setra manut drestha inggih punika sawidangan palemahan desa adat sane kamanggehang pinaka genah mendem layon, sawa utawi genah ngamargiang pabhasmian layon utawi sawaning sang lampus napkala ngamrgiang upacara pitra yajnya;
- (2) Setra desa adat Tegalwangi magenah ring nistha mandhalaning Pura Dalem (Kahyangan Tiga) Desa Adat Tegalwangi;
- (3) Setra desa adat Tegalwangi saha jangkep ring panghuluning setra sane mawasta pura Prajapati;
- (4) Palemahan setra desa adat Tegalwangi patut pastika watesnyane saha utsahayang sumangdane kawentenan setra inucap satata ranum, rasmi lan inggil taksun nyane;
- (5) Kasukrettan miyah kasutreptyan migunayang setra kamanggehang makadi ring sor :
 - ha. Setra desa adat Tegalwangi manggeh pinaka setra krama desa adat Tegalwangi sane magama Hindu;
 - na. Migunayang setra desa adat Tegalwangi patut masadok ring prajuru desa adat Tegalwangi sane kamanggalaning olih bandesa adat Tegalwangi;
 - ca. Prade wenten krama dura desa adat Tegalwangi pacang migunayang setra desa adat Tegalwangi patut ngamolihang pamutus saking bandesa adat Tegalwangi;
 - ra. Desa adat Tegalwangi nampenin pamargi kramaning matempung napkala ngamargiang upacara pitra yajnya madasar antuk nawur pananjung batu sane kamanggehang manut pararem;
 - ka. Tan kawenangan ngawangun undung-undung utawi wangun kubur sane permanen ring palemahan setra desa adat Tegalwangi;
 - da. Tan kawenangan nginepang bangbang;

- ta. Prade wenten anak alit/rare lampus patut kapendem ring setra rare;
- sa. Tan wenang ngalah-alah palemahan setra desa adat miwah tan kapatutang ngangonang ubuh-ubuhan makadi banteng ring wawidangan palemahan setra desa adat;
- wa. Tan kapatutang makta sahananing sane ngawetuang rasa kacuntakan utawi leteh miwah cemer sane mawit saking palemahan setra desa adat kabakta kawawidangan desa adat, kapalemahan genah suci, kadunungan krama miwah sakancan nyane sane marupa laluwu wit setra, sakaluiring sarana witing ngeplugin sawa utawi upacara ngagah sawa miwah sakancan ipun;
- la. Sapasira ugi sane mamurug ring sadagingin pawos ring ajeng patut keni pamidanda manut pararem;

Palet 2
Indik Wawangunan
pawos 70

- (1) Krama desa adat sane pacang makarya wawangunan patut magaguat ring katattwan Tri Hita Karana, Tri Mandhala miwah magagulak ring tatebah asta bhumi miwah asta kosala-kosali;
- (2) Ngardining wawangunan ring sajeroning karang sikut satak patut mawates adepa agung saking wates karang ngajeroang;
- (3) Prade madruwe pikamkam pacang ngardi wawangunan matepas ring tembok wates patut sampun jangkep ring piranti talang toyan nyane mangda sampunang ngantos toyon sabehe runtuh ring pakarangan krama tiosan rawuh ring patamplig toyon nyane patut kapikahyunin, duaning wicara makadi asapunika pacang prasida ngardi manah kabhyaparan majeng ring krama panampih nyane;

- (4) Prade wenten wawangunan sane nyapcap ring pakarangan krama tios utawi nepas ring wates, patut kasepat gantungin utawi wawangunan inucap kagubar utawi sanisthane katebahin antuk talang sabeh gumentos mangda sareng sami sidda manggih rahayu;
- (5) Krama adat sane ngalinggihin karang sikut satak patut ngawangunang genah paciringan miwah jamban tinja sanisthane asiki satunggil karang tur kajangkepin antuk sombah pinaka pamletasan margin toyan sabeh nyujur jalinjingan;
- (6) Karang dunungan krama adat sane nenten nampih margin toya utawi jalinjingan mangda kautsahayang kapidabdabin olih sang jenek ring karang inucap nitenin palemahan karang nyane sampunang ngantos ngawetuang bhyapara abrasi miwah longsor;
- (7) Sapasira ugi sane malinggih ring sajeroning karang sikut satak mangda satata linga lan urati ring kawredian bhuwana agung utawi lingkungan duaning bhuwana agung manggeh pinaka bhawa maurip, prade lingkungane sungkan pastika sane ngalinggihin taler pacang kajamah dening panyungkane;
- (8) Krama desa adat sane ngalinggihin karang ayahan desa adat patut ngupapira karangnyane sakala niskala;
- (9) Krama adat sane midabdabin wawangunan miwah nginggilang swagina ring sajeroning widang utsaha mamiara wawalungan mangda sumeken ring atiti kraman nyane miwah tata sulur nyane, tan kawenangan ngawangun utsaha kahuripan untung ngaraga ngawetuang sangsara krama tios (Undang - undang lingkungan hidup);
- (10) Krama adat utawi sapa sira ugi sane ngalurug daging pawos ring ajeng patut keni pamidanda manut pararem, prade sane kalu-rug ngantos rawuh ring uger-uger guru wisesa patut kasadok-ang majeng ring sang rumawos;

Pawos 71

- (1) Krama desa adat miwah krama sane wenten ring satunggil karang ayahan desa adat patut linga lan urati ring kabresihan, karesikan margi, got (jalinjingan) miwah talajakan karang nyane soang-soang tur utsahayang mangda satata makanten rasmi, kedes miwah lestari;
- (2) Tan kawenangan ngutang laluwu, laluwu plastik, wangken wawalungan miwah sakancan nyane kamargi, kajlinjingan (got), karang krama tios pamekas kagenah sane prasida ngardi bhaya miwah kabhyaparan krama tios;
- (3) Tan kawenangan ngutang, nganyudang, nrebesang toya wit pwaregan (limbah dapur), toya mapalawah bacin janma/ tinja, toya wit plagan wawalungan (limbah ternak) kamargin toya makadi got (jalinjingan), telabah, tukad, kagenah suci, kapa-karangan krama tios, sapasira ugi sane mamurug patut keni pamidanda manut pararem miwah prade sane kacemerin genah suci patut kawewehin pamidanda nyane antuk ngamargiang pamrayascitta/upacara panyucian genah suci inucap;

Palet 3

Indik Wawalungan

Pawos 72

- (1) Krama desa adat sane madruwe swagina mamiara wawalungan sane mawiguna ring sajeroning dharma kahuripan patut pratyaksa ring atiti kramaning mamiara wawalungan, sanis-thané nguratiang indik kasukrettan miwah uger-uger maubuh-ubuhan;
- (2) Kalestarian bhuwana agung mabuat katitenin sumangdane siddha ngardi karahayuan tur nenten ngawetuang bhaya majeng ring kadirghayusan kahuripan (bhuwana alit) pamekas siddha

- ngardi rena majeng ring kahuripan imanusa (Undang - Undang Lingkungan Hidup);
- (3) Tan kawenangan mamiara wawalungan ngantos ngawinang rarusakan majeng ring genah suci, pakarangan krama tios, pabyanan krama tios miyah sakancan nyane, sapasira ugi sane mamurug patut kadanda manut pararem, prade ngantos ngarusak miyah ngawinan cemer genah suci pamidandan nyane kawewehin antuk ngawaliang rarusakan kajatimula sadurung karusak miyah nyuciang mawali genah suci sane kacemerin;
- (4) Mamiara wawalungan sane ngalurug ring kasukrettan utawi uger-uger guru wisesa wicaran nyane patut kasuksara majeng ring sang rumawos;
- (5) Krama desa adat patut waspada saha nitenin wawalungan sane gelis ngaraksa pinungkan nular utawi sakaluiring sato/ubuhan sane madruwe babekelan/pawiwan sungkan manular makadi rabies, cikungunya, kuku, cingur, DB, miyah sakancan nyane, sapasira ugi sane manggihin wenten wicara kadi punika patut digelis masadok ring prajuru utawi sang sane madruwe wawenang sumangdane digelis katepasin wicaran nyane;
- (6) Tatacara mamiara wawalungan sumangdane nenten ngawetuang rarusakan makadi ring sor :
- ha. Patut kakaryanang plagan wawalungan (genah wawalungan jangkep saha glogor nyane);
 - na. Sayaga ring genah pinaka panampa limbah nyane;
 - ca. Sayaga ring pabhogan nyane;
 - ra. Tureksa ring bhayan nyane;
 - ka. Tureksa ring kabresihan nyane;
 - da. Panglinaksanan nyane sakala niskala;
 - ta. Nginutin atiti krama kasukrettan guru wisesa;

Palet 4
Indik Kakayonan
Pawos 73

- (1) Tatanduran tanem tuwuh ring sajeroning pakaranganpatut maetangan adepa agung saking wates karang ngajeroang utawi tan wenang nandur tanem tuwuh nepek ring telenging wates karang (adepa agung kirang langkung 1,5 meter);
- (2) Sane ngaranjing ring kakuwub pawilangan tanem tuwuh inggih punika sarwa entik-entikan sane madruwe wit taru sidda mageng, madruwe akah watang tunjang miyah sarabut tur madruwe yusa ngantos suwe wawu sidda ngawetuung pikolih utawi asil (hortikultura) makadi tanduran kelapa, wani, duren muah sane lian-lianan;
- (3) Tan kawenangan nandur tanem tuwuh magenah ring palemahan genah suci sadwaning tatanduran kadi punika risampune mageng pacang ngardi rarusakan majeng ring palemahan miyah wawangunan sane wenten ring genah suci inucap;
- (4) Tatanduran sane sampun katami wenten ring sajeroning pakarangan krama adat prade kapikahyunin pacang sidda ngawetuung bhaya majeng ring sang ngumahin karang inucap miyah panampih karang inucap (krama tios) patut digelis tatanduran punika katotor utawi karebah;
- (5) Tatanduran sane nayubin wawangunan krama tios bilih-bilih katarka pacang sidda ngardi bhaya, risampune kawarayang majeng ring sang nruwenang, tan wenten piddab dab rahayu pacang nitenin tatanduran inucap, wenang kasadokang ring prajuru adat sumangdane wicara kadi punika sagelisa ngamolihang panepas tur nenten ngardi bhaya pungkuran, sang madruwe tatanduran patut kadanda manut pararem;
- (6) Prade wenten taru wit saking pakarangan krama adat ngarubuhin wawangunan krama tios panglinaksanan nyane makadi ring sor :

- ha. Patut kasadokang majeng ring prajuru adat;
 - na. Ngentosin rarusakan olih sang madruwe kakayonan;
 - ca. Ngupapira sane karusak antuk panyayut upacara pamra-yascitta manut pamutus prajuru adat olih sang sane madruwe kakayonan;
 - ra. Sang sane madruwe kakayonan sangkaning nenten lingo ring padruwean nyane patut keni pamidanda manut pararem;
 - ka. Prade sane karubuhin genah suci makadi pura patut kawewehin panyayut niskalan nyane antuk upacara pasapuhan (caru karubuhan) miwah guru pidhuka lan bendu pidhuka;
- (7) Tatanduran sane marupa entik-entikan sajeroning wigunan nyane patut kalaksanayang madasar pangunadika manut genah miwah rupan tatanduran inucap saha kailikitayang manut ring kasuksman tri hita karana miwah tri mandhala makadi :
- ha. Ring parhyangan utawi genah suci patut katandur sahananin entik-entikan sane mawiguna anggen ngamar-giang upacara yajnya makadi sarwa sari utawi sekar miwah sarwa dadaunan sane mapituas caniga;
 - na. Ring widang pawongan patut katandur sarwa prani utawi entik-entikan sane pacang prasida ngawetuang pikahyun-an bungah, lango miwah sakancan nyane;
 - ca. Ring widang palemahan sane ketah kabawos nistha mandhala makadi teba utawi karang kedi kangkat katandur tanem tuwuh sane nenten ngalikadin makadi sarwa phala, bungkah miwah sakancan nyane;
- (8) Krama desa adat sane madruwe bantaran karang ring ajeng utawi ring sisin margi patut kaupapira antuk nitenin telajakan nyane gumentos sidda makanten asri, rasmi miwah lestari saha tan kawenangan nunjel, nganyudang, ngentungang

laluwu miyah wangken wawalungan katelemping got utawi jalinjingan mapuara mampet lan cemer toya sane wenten ring got utawi jalinjingan inucap, sane mamurug sasampun kapatingetin wenang kadanda manut pararem;

Palet 5

Karesikan Lan Kalestarian Desa Adat

Pawos 74

- (1) Krama desa adat Tegalwangi ring sajeroning midabdabin Tri Hita Karana satata linga lan urati ring karesikan miyah kalestarian wawidangan desa adat saha mautsaha ngamargiang pidabdab madasar antuk laksana sakala niskala;
- (2) Jagra ring karesikan miyah kalestarian widang parhyangan prajuru desa adat miyah manggala desa adat sane kawantu olih pamangku desa adat satata tureksa lan ngamargiang parikrama manut ring kasukrettan parhyangan makadi :
 - ha. Teteg ngamargiang upacara piodalan ring kahyangan utawi pura manut ring drestha sane manggeh miyah agama Hindu;
 - na. Ngalaksanayang parikrama mararesik utawi gotongroyong ring palemahan parhyangan sanisthane ngasasih apisan;
 - ca. Prajuru desa adat sane kawantu olih pamangku desa adat lan patilik desa adat muah krama desa adat satata ngawentenan pacacingak mastikayang gumentos parhyangan inucap nenten ngantos kacoba utawi kajamahkasotreptyan nyane olih duracara miyah dusta, ring dadhya, panti, paibon miyah sanggah, marajan kalaksa-nayang olih pangempon, panyungsung soang-soang;
 - ra. Napkala ngamargiang upacara ring kahyangan prajuru desa adat satata nitenin ring sapamargin sarana miyah

- piranti sane mapituas ngirangin utawi bilih kangkat nenten nganggen sarana plastik miwah sakancan nyane;
- ka. Napkala ngaturang bhakti ring genah suci utawi pura para pamedek mangda nginutin tata bhusana manggeh kadi kramaning bhusana kapura (tata bhusana);
- (3) Jagra ring karesikan miwah kalestarian widang pawongan panglinaksanan nyane makadi ring sor :
- ha. Krama desa adat satata madruwe pidabdab nincapang lan ngalimbakang pangaweruh nyane sajeroning nginggilang dharma kahuripan;
- na. Krama desa adat satata sayaga nampenin lan nginutin pawarah guru wisesa indik aguron-guron majeng ring krama adat sane mapituas ring kawagedan widya sastra makadi pasraman pamangku, pasraman basa bali, pasantian, karawitan, igel-igelan utawi balih-balihan, sarati upakara lan sane tiosan mapikenoh ring sajeroning kawredian miwah kalestarian adat, agama Hindu, budaya, miwah drestha sane manggeh rawuh kapungkur wekas;
- ca. Desa adat Tegalwangi nenten pacang ngawatesin miwah ngandeg prade krama desa adat lan pratisantanan nyane madruwe pikamkam pacang ngulati pakaryan, swagina miwah ngaruruh kawagedan kahuripan utawi ngalanturang, nincapang pangaweruh (pendidikan, sekolah) kaundagan sane pinih duwuran (jenjang lebih tinggi) ngantos rawuh kadura nagara;
- (4) Jagra ring widang palemahan panglinaksanan nyane makadi ring sor :
- ha. Wawidangan desa adat katitenin antuk ngamargiang pararesikan miwah gotong royong sane kadudonang olih prajuru desa adat;

- na. Mararesik utawi gotong royong ring margi desa adat, karang desa, palemahan setra desa adat kalaksanayang sanisthane tigang wuku apisan;
- ca. Desa adat sayaga ngardi miwah ngawangun pasewakan saparindikan sane sidda ngawetuung kacemeran ring bhuwana agung pamekas sane mapakilitan ring laluwu manut rupa lan bhyapara sane kawetuung makadi marupa organik, anorganik miwah laluwu medik;
- ra. Desa adat nitenin miwah nyulurang tataning tatanduran sane mawiguna pinaka panayuh utawi paneduh miwah panyangga konservasi sane madruwe kamiringan 30 % sane magenah ring karang desa adat, palemahan genah suci, margi desa adat, setra miwah genah- genah wed toya utawi talebutan toya;
- ka. Talajakan karang ayahan desa adat katitenin olih krama desa adat sane ngalinggihin karang inucap;
- da. Tan kawenangan mabacin utawi makoratan ring margin toya makadi jalinjingan, telabah, tukad miwah sakancan nyane sadwaning sahananing tinja miwah bacin janma prade macampuh ring toya pacang sidda ngawetuung pinungkan sane mawit saking sakancan rupan bakteri;
- ta. Krama desa adat sane pacang mapawangunan ring pajenekan nyane soang-soang, tan kawenangan ngenahang sarana wawangunan ring margi agung langkungan ring pitung dina utawi awuku;
- sa. Prade sarana wawangunan sane kagenahang ring margi agung ngalangkungin pasengkeran dina sangkaning wenten pawilangan tios sane ngawinang durung prasida kagingsiran, sang madruwe sarana inucap patut masadok ring prajuru adat saha sarana punika nenten ngalangin utawi nyantulin miwah ngalikadin sang sane pacang ngangge margi agung;

- (1) Soang-soang warung, penggak, utawi satunggil ngawentenang genah madolan patut sampun sayaga ring wadah utawi genah laluwu manut ring rupa miwah bhayaning laluwu inucap;
- (2) Nenten dados ngutang, ngentungang lan ngenahang sakaluiring laluwu ring karang krama tios, margi agung, got/jalinjingan, telabah, tukad miwah sakancan nyane, prade mamurug patut keni pamidanda manut pararem;
- (3) Krama desa adat sane madruwe swagina mamiara wawalungan makadi ayam, itik bawi, kambing, banteng miwah sakancan nyane patut katitenin manut ring kasukrettan sane manggeh ring utsaha mamiara wawalungan inucap, prade lempas ring uger-uger nyane patut kasadokang ring sang rumawos sane ngawenangin wawalungan inucap;
- (4) Sakaluiring ubuh-ubuhan sane kapiara tan kawenangan ngantos ngawetuang bhyapara miwah kacemeran ring bhuwana tiga utawi lingkungan(prathiwi, apah, akasa / tanah, toya, angin/udara), prade bhuwana tiga kacemeran janma utawi pangoregnyane taler pacang kabhyaparan sanisthane siddha ngardi pinungkan sakala lan niskala (angga sarira lan pikahyun);
- (5) Sane kacihna mabhukti ngardi kacemeran bhuwana bilih-bilih kacuntakan ring genah suci, sang malaksana patut keni pamidanda manut pararem;

SARGAH ENEM
WICARA, BHAYA, DUSTA MIWAH PAMIDANDA

Palet 1

Indik Wicara

Pawos 76

- (1) Sahananing wicara sane mawetu ring desa adat Tegalwangi patut katibakin pamutus olih bandesa adat sajeroning paruman krama desa adat;
- (2) Nibakang pamutus wicara patut satata kadasarin antuk pituas sane manggeh ring patitis lan pamikukuh awig-awig desa adat;
- (3) Sahananing wicara sane muatang panepas mapakilitan ring pangrencana tata adat lan pawangunan undagan madhya miyah kapungkur wekas sane sandang ngaranjing sajeroning kasukrettan utawi hukum adat - istiadat kapatutang bandesa adat kaabih olih kertha desa adat;
- (4) Sahananing wicara sane muatang panepas mapakilitan ring kasukretan miyah kasutreptyan sane manggeh ring uger-uger guru wisesa patut kaabih olih bandesa adat, sabha desa miyah kertha desa adat;
- (5) Manut ring pakibeh jagate makadi mangkin sakaluiring wicara sane wenten ring desa adat Tegalwangi patut kapidabdabin miyah kabuntasang pawicaran nyane olih manggala desa adat (prajuru adat, sabha desa, kertha desa) sadwaning nitipraja adat miyah nitipraja dinas sajeroning nabdabin pawangunan sampun masikian/tunggil ring pangrencanan nyane;
- (6) Wicara sane mawetu ring desa adat prade nenten ngamolihang pamutus ring desa adat utawi durung/ nenten prasida katepas-in ring desa adat patut kasadokang utawi katumusang ring Majelis desa adat manut ring undagan nyane;
- (7) Sahananing wicara sane mapakilitan ring saparindikan kaperdataan (hukum perdata) patut karapih olih kertha desa adat lan katumusang majeng ring sang rumawos sasampun

ngamolihang wak-wakan saking Majelis Desa Adat manut ring undagan nyane;

Pawos 77

Tata cara ngarampag prade wenten krama adat sane keni pamidanda rerampagan kasulurang makadi ring sor :

- (1) Sampun kacumawisang manut pamutus gumanti patut karampag;
- (2) Sang karampag nenten pacang ngalangin prade kamargiang kramaning rerampagan dwaning sampun ngalinggihin kaiwang-an nyane;
- (3) Sane ngamargiang pangrampag prajuru adat, sabha desa adat, kertha desa adat, manggala dinas kawewehin prajuru pacalang saha angga kalih diri;
- (4) Rarampagen patut ngetanggang padruwen krama adat manut ring agung alit piutang sane patut katanganing;
- (5) Prade sane karampag pangargan nyane langkungan ring utang sane patut katawur, sesan nyane patut kawaliang ring sang sane nruwenang rarampagen;
- (6) Tan kawenangan ngarampag padruwen krama adat sane mapituas ring sahananing sarana sane prasida ngicenin wiguna pinaka sarana panglantur kahuripan makadi perabotan parantenan, perabotan kasawah marupa pacul, tenggala, singkal, arit/sabit miwah sakancan nyane;
- (7) Tan kawenangan ngarampag sahananing sarana sane mapituas ring pidabdab nginggilang kasucian warga utawi krama Hindu makadi sanggah, marajan utawi genah suci, pratima utawi pralinggan bhatara, bhusana palinggih miwah genah paturuan krama;
- (8) Sane wenang kerampag pinaka walaning kaiwangan makadi mole-mole marupa tanah padruwen krama (boyo tanah

- ayahan desa adat), emas-emasan, sarana utsaha miwah sakancan nyane;
- (9) Tan kawenangan ngamademang sahananing sarana sane kadruwenang olih krama sane mapituas pinaka sarana panglantur kahuripan utawi kanggen ngaruruh pangupa-jiwa;

Pawos 78

- (1) Prade wenten krama adat malaksana nyewanggara majeng ring prajuru adat miwah pamangku desa adat patut keni pamidanda manut pararem;
- (2) Prade wenten krama adat mawicara nguman-uman utawi mabawos patikacuh lan nemah mamilisuh ring sajeroning paruman desa adat patut keni pamidanda manut pararem;

Palet 2

Bhaya lan Dusta

Pawos 79

- (1) Bhaya inggih punika kawentenan jagat, sarwa prani miwah janma utawi manusia sane mengpeng kalancubin olih kabhyaparan mawastu nandang kasangsaran bilih manawi ngantos ngawetuang kalampusan;
- (2) Bhaya sane wenten ring jagate lumbrah kabawos panca bhaya rupan nyane makadi ring sor :
- ha. Bhayapati utawi jiwa bhaya mawiwit sangkaning kaamuk, kabaak, kabancana kapet patinia miwah sakancan nyane;
 - na. Artha bhaya taler kabawos kamalingan, kabegal miwah sakancan nyane;
 - ca. Genibhaya utawi katunuan, kapuwunan utawi bhaya mawiwit sangkaning geni utawi api;
 - ra. Blabur Agung utawi toya bah/bandang utawi bhaya sane nibenin sangkaning toya sane mageng;

- ka. Bhayubhaya utawi bhaya sane nibenin sangkaning angin ngalinus utawi putting bliyung;
- (3) Tiosan ring bhaya makadi sane kaonek ring ajeng manut ring pakibeh jagatae makadi mangkin patut taler kaprattyaksayang ring kawentenan bhaya sane pacang prasida nibenin jagate makadi :
- ha. Karipubhaya inggih punika bhaya sane mawetu ring jagate sangkaning wenten duratmaka (pangrencanan manusa sane ngamargiang asta dusta)
 - na. Kameranan inggih punika bhaya sane pacang nibenin majeng ring sakancan entik-entikan utawi sarwa prani mawastu nenten prasida ngamolihang pamupon raris ngawetuang pamargi sukil antuka ngaruruh pangupajiwa mawastu ngardi kamelaratan ring jagate;
 - ca. Bhaya sangkaning kageringan utawi sungkan mawabah / gering tatularan , makadi tubercollose, ngutah-mising (muntahber), covid, miwah sungkan sankaning katularang olih biang semang nyane makadi legu utawi bactery miwah sakancan nyane;
 - ra. Bhaya sangkaning ketug lindhu sane tan prasida kaprattyaksa pasangkan nyane (linuh);
- (4) Sapasira ugi sane manggihin, ngatonang cihna bhaya makadi ring ajeng patut digelis kasadokang majeng ring prajuru utawi sang sane madruwe kawenangan nepasin indik bhaya inucap sumangdan nyane sagelisa ngamolihang panamban nyane;
- (5) Sapasira ugi uning ring pasangkan bhaya sane nibenin sinunggil krama ring desa adat patut digelis nyuarayang kulkul bulus utawi masadok ring prajuru adat utawi patilik desa adat manut ring rupan bhaya sane kapanggihin makadi bhayapati, bhayubhaya, toyabhaya, karipubhaya, kamalingan miwah sakancan nyane.

(6) Krama adat sane mirengan suaran kulkul cihna wenten bhaya sane nibenin ring desa adat patut kasawurin antuk kulkul sane kadruwenang ring paguyuban nyane soang-soang saha nedunin suaran kulkul inucap jangkep dening sarana pitulung manut rupaning bhaya;

Pawos 80

- (1) Sane kabawos dusta inggih punika laksanan janma utawi manusa sane pinaka wiwilan janma tios ngemasin kapatian sanisthane sangsara ring kahuripan lumbrah kabawos asta dusta makadi :
 - ha. Himsakah inggih punika laksanan janma sane mamati-mati utawi nyayanang ngamademang janma tios;
 - na. Codakah inggih punika marikosa madasar parilaksana bringas(ngarampok, megal, smaradudu brutal) miwah sakancan nyane;
 - ca. Bhojakah inggih punika ngicening sangu majeng ring sang ngamademang janma;
 - ra. Sakarakah inggih punika mapitulung ring sang malaksana ngamademang janma;
 - ka. Pratikarah inggih punika masawitra ring pamadem janma;
 - da. Sthanada inggih punika ngicenin pasayuhan utawi padunungan ring sang pamadem janma;
 - ta. Tratah inggih punika ngayomin sang sane malaksana ngamademang janma;
- (2) Sapasira ugi sane mabhukti malaksana asta dusta ring desa adat Tegalwangi patut keni pamidanda manut pararem;
- (3) Sapasira ugi sane manggihin sang malaksana asta dusta ring desa adat Tegalwangi patut sagelisa atur supeksa majeng ring prajuru adat sumangdane digelis prasida kamargiang panepasnyane;

- (4) Krama desa adat sane nguningin, nyaksiang, manggihin sang malaksana asta dusta tur nenten nyadokang ring prajuru utawi sang ngawiwenang kabawos saruron ring dusta, krama inucap patut keni pamidanda manut pararem;

Pawos 81

Prade ring desa adat Tegalwangi katibanan bhaya sane muatang panepas pamargi masaserep panglinaksanan nyane kasulurang makadi ring sor :

- (1) Patut polih pamutus saking prajuru adat sasampun katimbang-in olih kertha desa adat;
- (2) Masaserep kaupasaksi olih manggala desa adat miwah manggala dinas lan pacalang;
- (3) Prade ngantos rawuh kadura desa adat, prajuru kaabih dening pacalang patut sampun pada saheloan ring pamargi panepas wicara inucap majeng ring desa adat sane katuluh;
- (4) Pamidanda sane katibenin majeng ring sang malaksana bhaya utawi wicara inucap mabantang sulur adat lan dinas;
- (5) Pamidanda nginutin sulur adat patut kaputusang ring sajeroning paruman desa adat;
- (6) Pamidanda sane nginutin sulur dinas kasuksara majeng ring sang rumawos;
- (7) Prade mapakilitan ring genah suci pamidandan nyane patut kawewehin antuk ngawaliang kasucion genah inucap saha kaputusang ring sajeroning paruman;

Palet 3

Indik Pamidanda

Pawos 81

- (1) Desa Adat Tegalwangi kawenangan nibakang pamidanda majeng ring sapa sira ugi malaksana tan manut ring uger-uger sane manggeh ring desa adat Tegalwangi;

- (2) Niwakang pamidanda patut ring sajeroning paruman desa adat tur kaputusang olih bandesa adat sasampun katimbangin olih kertha desa adat;
- (3) Niwakang pamidanda majeng ring krama desa adat patut mabantang ring kasuksman pamikukuh lan patitis awig-awig desa adat Tegalwangi;
- (4) Pamidanda prasida katiwakang majeng ring krama adat sane malaksana iwang utawi ngalurug kapatutan daging kasukertha tata adat sane sampun kacumawisang sajeroning awig-awig desa adat;
- (5) Pamidanda mateges hukum adat pastika kaiwangan nyane saha nginutin prawertin tri pramana (saksi, bhukti miwah ilikita), lan parilaksana sane prasida ngawetuang surud miwah rered kawibhawan desa adat sane sampun manggeh saking rihin rawuh mangkin lan kapungkur wekas;
- (6) Panglaksanan pampargin pamidanda ring desa adat Tegalwangi kepah dados kalih soroh, luir ipun :
- ha. Pamidanda sane marupa pangwalatkara pamargi swadharmaning krama adat, makadi :
- 1) Dudukan dadosan mawit sangkaning nenten ngarawuhin napkala karya utawi patedunan adat;
 - 2) Tulak minci mawit saking ngaranjing pinaka krama adat tan kajenekan apisanan saha nenten madasar pangunadika;
 - 3) Malencerin teges ipun napkala patedunan adat wenten ring sajeroning desa adat tur nyelapang mabalih patedunan adat sangkaning girang boyo sangkaning kabhyaparan utawi sungkan utawi risedekan ngamargiang karya sukha duhka;
 - 4) Panyagsag wirasa mateges ngampura sangkaning marasa ring padewekan malaksana iwang miwah

- mawicara sane neten patut ring krama miwah sasamaning janma;
- 5) Panyagsag wirasa sangkaning malakksana iwang majeng ring prajuru adat lan pamangku miwah nguman-uman sajeroning paruman patut kadanda manut pararem;
 - 6) Nibakan pamidanda majeng ring sang malaksana makadi ring ajeng (1 rawuh 5) pamutus nyane patut madasar putusan paruman;
- na. Pamidanda sane kamargiang pinaka panebas kaiwangan utawi majeng ring krama utawi sapasira ugi sane ngalurug sadagingin kasukrettan awig-awig desa adat miwah kasutreptyan desa adat Tegalwangi makadi :
- 1) Pamidanda sane marupa artha miwah panyangas-kara;
 - 2) Sarana miwah mole-mole wit rerampagan;
 - 3) Kabancut swadharman nyane miwah karang ayahan desa adat nyane;
 - 4) Kasepekang sangkaning nenten nginutin kasukrettan desa adat sane katilik inggil lan mabuat saha ngawetuang rered kawibhawan desa adat inucap;
 - 5) Kanorayang miwah kabancut cacah jiwa utawil pipil kraman nyane sadwaning nenten prasida ngesehin parisolah lan satata ngawe bhyuta ring desa adat;
 - 6) Pamidanda kamargiang manut pamutus paruman sasampun katimbangin olah manggala desa adat miwah dinas lan MDA manut undagan nyane, uttaman nyane napkala nibakang pamidanda sane mateges kanorayang;
 - 7) Phalaning danda miwah phalaning rerampagan manggeh pinaka padruwen desa adat;

Pawos 82

Mapakilitan ring wicara lan pamidanda, krama desa adat patut nginutin kasukrettan dresta lan agama Hindu ring desa adat Tegalwangi makadi ring sor:

- (1) Tan kawenangan miwah tan kapatutang mendem utawi ngeseng sawa tiosan ring setra desa adat Tegalwangi, prade mamurug keni pamidanda manut pararem;
- (2) Desa Adat Tegalwangi nampenin pidabdab utawi pikamkam ngamargiang kramaning ngaben kremasi prade sang lampus nenten magenah ring dunungan krama adat (lampus nyane ring dura desa adat) tur pamargine punika wantah pinaka panepas kabhyaparan kahyun sang madruwe kalayuan miwah kabrebehan pangalantaka ring desa adat;
- (3) Krama adat sane lampus ring dunungan wawidangan desa adat Tegalwangi patut kupapira pamratekan nyane magenah ring setra desa adat Tegalwangi, prade kamargiang ring dura desa adat manut katattwan nyane kabawos *nundung sawa*;

SARGAH PITU NGUWAH-UWUHIN AWIG-AWIG

Pawos 83

- (1) Nguwah - uwuhin awig - awig patut kabawosang ring sajeroning paruman agung desa adat sane mawiwit saking wentene pidabdab miwah pikamkam ngantenang ring sadagingin awig-awig kacihna sampun nenten prasida kalaksanayang manut ring pamatut miwah pakibeh jagate sane mengpeng lumaksana;
- (2) Pidabdab miwah pikamkam ngamargiang pamaripurnayang awig-awig patut kasungkemin puluk olih krama desa adat yadiastun karembayang utawi kaonek olih sinunggil krama ring sajeroning paruman manggeh pinaka usul ring sajeroning paruman;

- (3) Nguwah-uwuhih awig-awig prasida kalaksanayang sanistane limang warsa apisan sadwaning ring sajeroning mawaneng limang warsa pamargi kasukrettaan sane wenten ring nitipraja-ning tata adat kaparna pacang wenten pamargi panglinaksanan tata adat sane patut magentos kawicaksanan nyane;
- (4) Sakanganing pidabdab tata adat sane kacumawisang ring sajeroning awig-awig mawit saking sarining catur dresta manggeh pinaka gaguat pangiket krama adat sane madruwe wiguna manggeh pinaka hukum adat;
- (5) Sakaluiring pamutus sane kamedalang ring sajeroning paruman desa adat patut satata mabantang antuk pakukuh adat-istiadat yadiastun sampun wenten kasukrettan sane tiosan sane manggeh ring panegara krama makadi KUHP sadwaning hukum adat taler manggeh sida lumaksana pinaka piranti hukum sane ngardi kasutreptyan ring jagate;
- (6) Awig-awig desa adat kawangun pinaka dasar ngamargiang pidabdab sane mawit saking panglinaksanan Tri Hita Karana manut tattwaning Agama Hindu;

SARGAH KUTUS

S A M A P T A

Pawos 84

- (1) Awig-awig puniki mawasta Awig-awig Desa Adat Tegalwangi;
- (2) Awig-awig Desa Adat Tegalwangi kamargiang ngawit saking sasampun kararemin olih krama desa adat Tegalwangi;
- (3) Awig-awig desa adat Tegalwangi puniki kamanggehang lan kalaksanayang ring sajeroning kakuwub wawidangan desa adat Tegalwangi;
- (4) Awig-awig desa adat puniki kamanggehang miwah kasahang olih krama desa adat Tegalwangi;

- (5) Sakaluiring pidab dab miwah pikamkam sane mapakilitan ring panglinaksanan tata adat manut makadi dresta sane kantun prasida manggeh pamatu tnyane kalaksanayang ring desa adat Tegalwangi durung kasurat ring sajeroning awig-awig puniki prasida kalaksanayang makadi patut saha pacang kaunggahang sasuratan nyane ring sajeroning pararem pinaka turunan awig-awig desa adat Tegalwangi;

Pawos 85

- (1) Awig-awig puniki kasurat, kararemin, kalinggatanganin duk dina Redite Wage wara Krulut, pangelong apisan, sasih Kapitu, Isaka Tri Suci Gapuraning Rat (1943), tanggal masehi 19 Desember 2021 magenah ring Desa Adat Tegalwangi;
- (2) Awig-awig puniki kasurat, kararemin, kalinggatanganin olih prajuru desa adat;
- (3) Luir sang sane ngalingga tanganin makadi ring sor :
 - ha. Krama Desa Adat Tegalwangi manut cacakan kasurat ring lepihan;
 - na. Prajuru Desa Adat Tegalwangi :



Adat Tegalwangi,

I Ketut Dibuya

Patajuh,

Ida Bagus Made Rai

Panyarikan,

I Nengah Supa

Patengen,

I Made Kanca



Kelurahan Adat Tegalwangi,

Ida Bagus Made Rai

Pangrampih,



Majelis Desa Adat (MDA)
Kabupaten Klungkung
Bandesa Madya,

Dewa Made Tirta, S.Pd., M.Pd

Majelis Desa Adat (MDA)
Kecamatan Banjarangkan
Bandesa Alitan,

Cokorda Gede Brasika Putra, S.H.

Saha Uning

MAJELIS DESA ADAT PROVINSI BALI

Nomor : QM/AWC-K/MDAP/IV/2025

Tanggal : 3 April 2025



Bandesa Agung

Ida Pangelingir Agung Putra Sukahet

Panyarikan Agung,

Dr. Dewa Nyoman Rai Asmara Putra, S.M., M.H

Telah Dicatatkan

Pada Dinas Pemajuan Masyarakat Adat Provinsi Bali

Tanggal : 11 April 2025

Registrasi Nomor : A/0025/1344/050/08/DPMA/2025